

# Të Vërteta Madhore

në

# Librin e Romakëve

---

**Të Vërteta Madhore në Librin e Romakëve**

Teksti nga Paul Reid  
Ilustrime nga Tim Shiri  
Përkthye nga Leonard Doka

European CEF Centre  
Kilchzimmer  
CH-4438 Langenbruck  
Switzerland

**JU LUTEMI VINI RE!**

Vizualet për këtë seri mund të blihen në pjesën më të madhe të zyrave të BUF-it dhe në dyqanet në internet. Për një listë të zyrave të BUF-it dhe dyqaneve në internet në Evropë, ju lutemi vizitoni [www.teachkids.eu/al](http://www.teachkids.eu/al) dhe kliko mbi "Vendet".

**Bashkësia e Ungjillëzimit të Fëmijëve**  
Kutia Postare 249  
Durrës  
Albania



**BUFESH**  
BASHKËSIA E UNGJILLIZIMIT  
TË FËMIJËVE E SHQIPËRISË\*

Copyright © 1990 European Child Evangelism Fellowship

Të gjitha të drejtat e rezervuara. Përdorur me leje.

Mund të riprodhohet vetëm për përdorim personal, shërbese,  
jofitimprurës ose jo-komercial. Vizitoni [www.teachkids.eu/al](http://www.teachkids.eu/al)  
për më shumë detaje mbi lejen e përdorimit.

# Hyrja

Djemtë dhe vajzat kanë nevojë për të mësuar nga historitë e Biblës. Por fëmijëve duhet t'u mësohen edhe të vërtetat e mrekullueshme që na janë dhënë nga Perëndia në letrat e Dhiatës së Re. Këto mësimë janë një përpjekje për të shpjeguar në mënyrë të thjeshtë disa prej doktrinave madhore që Apostulli Pal parashtron në librin e Romakëve.

Këto mësimë mund të përdoren në Klubet e Lajmit të Mirë, mësimet e së Dielës, Klubet Biblike të Pushimeve, kampet Biblike, dhe takimet e Nxitjes së Adoleshentëve, dhe veçanërisht me **fëmijë më të rritur**. Ato mund të mësohen brenda 6 javëve, megjithëse disa prej mësimëve mund të ndahen në 2 pjesë, nëse ka shumë materiale për një pjesë. Një dramë e shkurtër është përfshirë në fund të manualit mbi temën e shfajësimit; kjo mund t'u paraqitet prindërve mundësisht në fund të serisë-për programin e Ditës 7.

Aktivitete të tjera të lidhura sugjerohen në fillim të çdo mësimi. Ato mund të jenë veçanërisht të dobishme nëse jeni duke i përdorur në Klubet Biblike të Pushimeve, kampe Biblike, takimet e Nxitjes së Adoleshentëve dhe ndoshta në orët e mësimi të së Dielës, kur ju keni kohë të mjaftueshme për t'i lënë fëmijët që të marrin pjesë në mënyrë më të plotë. Një parim i përgjithshëm i të mësuarit është që nxënësit mësojnë me shumë duke **bërë**, sesa vetëm duke dëgjuar dhe parë.

Unë nuk kam dashur të mësoj tërë librin e Romakëve pasi kjo do të ishte e pamundur në 6 mësimë të shkurtra. Kam bërë një përzgjedhje me disa prej temave të rëndësishme që Pali trajton në këtë letër, duke ndjekur zhvillimin e mësimi të tij.

Dënimi	Kapitujt 1, 2 dhe 3
Shfajësimi	4 dhe 5
Shenjtërimi nëpërmjet shërbesës së Frymës së Shenjtë	7 dhe 8
Zgjedhja	9, 10 dhe 11
Trupi i Krishtit (kisha)	12
Shërbesa e krishterë	13, 14 dhe 15

Një faqe me vargjet kryesore të cituara jepen në fund të çdo mësimi. Kjo faqe mund të fotokopjohet dhe t'u jepet secilit nxënës, që të ndjekin mësimin nga Bibla.

Dy mësimet e para janë më ungjillzuese dhe katër të fundit janë më shumë për të

mësuar fëmijë të krishterë. Megjithatë, edhe një mësim si ai i fundit mbi shërbesën e krishterë mund të jepet për përfitimin e fëmijëve të pashpëtuar, duke i ndihmuar ata që të kuptojnë se ata nuk mund t'i shërbejnë Krishtit nëse nuk i besojnë Atij si Shpëtimtarin e tyre. Kur ata vijnë te Krishti, nuk ka vetëm ndryshim në qëndrimin e tyre në sytë e Perëndisë, por edhe një ndryshim në qëndrimin e tyre ndaj të tjerëve. Është mirë për ta që të dinë se çfarë ndodh kur ata i besojnë Krishtit.

Jini gjithnjë të vëmendshëm ndaj nevojave frymore të fëmijëve të pashpëtuar në orën e mësimi. Ata duhet ta kenë të qartë gjithnjë që ju, si mësues, jeni gati t'i ndihmoni dhe këshilloni ata nëse janë duke kërkuar Zotin.

Në mësimet e fundit të kësaj serie, kur mësimi kryesor është për të krishterët, ju mund të përfshini një paraqitje të shkurtër të Ungjillit në disa pjesë të tjera të programit të orës së mësimi. Për shembull ju mund të jepni një mësim të shkurtër me objekte si Libri Pafjalë, ose të këndonin disa këngë ungjillzuese me fëmijët. Pas një kënge të tillë si "Lajmi i Mirë, Lajmi i Mirë..." ju mund të thoni diçka të tillë si kjo:

"Në këtë klasë ka disa djem dhe vajza që nuk i kanë besuar ende Krishtit si Shpëtimtar i tyre-siç mëson kjo këngë: ata nuk kanë besuar në Të që t'ua marrë mëkatet e tyre dhe t'u japë jetën e përjetshme. Ndoshta ti nuk i ke kërkuar Krishtit që të të shpëtojë. A je i shqetësuar për mëkatin dhe a do të doje të shpëtoheshe? Ndoshta ti nuk je i sigurt sesi ta marrësh këtë hap. Unë jam gjithnjë gati që të të ndihmoj me aq sa mundem. Sot pas mësimi, kur të tjerët dalin jashtë, ti mund të qëndrosh të ulur në karrigen tënde dhe unë me kënaqësi do të të tregoj personalisht se si ta vendosësh besimin tënd në Zotin Jezus Krisht si Shpëtimtarin tënd."

Lutja ime është që këto mësimë do t'ju ndihmojnë për t'u paraqitur fëmijëve "Ungjillin e Perëndisë, në lidhje me Birin e Tij Jezus Krishtin Zotin tonë", në mënyrë që fëmijët të shpëtohen dhe të rrënjosen në besim (Romakëve 1:1, 3, 11 dhe 16).

Paul Reid

Drejtori i BUF për Spanjën

# Mësimi I

## Fajtor thotë Gjykatësi

**Pasazhet Biblike:** Ky mësim përmbledh mësimin e Romakëve 1-3.

Do të ishte mirë për mësuesin që t'i lexojë të tre kapitujt, por veçanërisht pasazhin 3:9-26 që jep përfundimet kryesore.

**E Vërteta Qendrore:** (VQ) Para Perëndisë, Perëndisë së gjithëditur, Gjykatësit të drejtë ne jemi të gjithë fajtorë.

**Zbatimi për të Pashpëtuarit:** (VQP) Kthehuni nga mëkati dhe pranoni faljen që ju ofron Perëndia.

**Zbatimi për të Shpëtuarit:** (VQSH) Çojeni Ungjillin tek ata që janë nën dënim.

**Mësues,** nëse është e mundur, përgatitni për fëmijët një listë me kërkesa lutjesh nga një misionar që punon me Hebrenjtë.

**Vargu Përmendësh:** “Perëndia do të gjykojë të fshehtat e njerëzve me anë të Jezus Krishtit, sipas ungjillit tim” (Romakëve 2:16).

(Për fëmijë më të vegjël, vetëm mësoni “Perëndia do të gjykojë të fshehtat e njerëzve”.)

### Skema:

Hyrja: Kënaqësia e një libri të mirë.

Piktura I-1: “Romakëve” është një libër i veçantë, sepse është shkruar nën frymëzimin e Perëndisë.

Piktura I-2: Çfarë ndodh në një gjyq? Perëndia është Gjykatësi i drejtë i njerëzve.

Piktura I-3: Perëndia shpall se ata që nuk e pranojnë Fjalën e Tij të shkruar janë megjithatë fajtorë, sepse ata nuk e njohin dhe adhurojnë Atë si Krijuesin e botës. VQSH

Piktura I-4: Edhe hebrenjtë janë fajtorë, sepse nuk u janë bindur Fjalës së Perëndisë që ju është dhënë. VQSH

Piktura I-5: Të gjithë janë fajtorë para Perëndisë. VQSH

Piktura I-6: Dy vëllezër shkojnë në dy drejtime të ndryshme.

Piktura I-7: Gjykatësi dënon vëllain e tij, si fajtor për krime, por e paguan vetë dëmshpërblimin.

Piktura I-8: Perëndia na shpall fajtorë, por nëpërmjet Krishtit e pagoi Vetë ndëshkimin. VQP

### Aktivitete të lidhura:

**Një Skeç:** Në fund të këtij manuali kemi një dramë të cilën mund ta paraqesin pas dhënies së gjashtë mësimëve. Për javën e parë bëni fotokopje të tekstit për ata të grupit dhe ju mund të filloni të shpërndani pjesët e skenave 1, 2 dhe 3. Do t'ju nevojiten: një tregues, Kevin, Xhek, zoti Tod, polici i parë, polici i dytë, zonja Stjuart, sekretarja e gjyqit. Jepuni pjesët më të gjata atyre që janë më të aftë për të kryer detyrën. Zgjidhni pjesë më të shkurtra për nxënësit më të ndrojtur ose më të vegjël. (Kijeni parasysht se ka dy pjesë të rëndësishme për herën tjetër-për vajzat.) Filloni të lexoni dramën me grupin tuaj. Nxitini fëmijët që të fillojnë të mësojnë rolet e tyre. Çdo javë ju mund të vazhdoni të lexoni dhe të përsërisni. Duke e bërë këtë, ju jeni duke ua mësuar fëmijëve doktrinën madhore të shfajësimit.

**Një Konkurs i Përsëritjes:** Kjo jepet në fund të këtij mësimi dhe mund të përdoret pas mësimit këtë javë ose në pjesën tuaj të ardhshme. Është në formën e një gjëegjëze në një dërrasë të zeze ose në një fletë të madhe kartoni (50 x 70 cm). Kërkojuni fëmijëve që të dalin përpara për të shkruar fjalët me shkumës ose stilolaps ngjyrues. Një mundësi tjetër është të fotokopjoni gjëegjëzën dhe secili fëmijë të punojë vetë, ose dy nga dy.

# Mësimi

## Hyrja

Unë shpresoj se ju pëlqen të lexuarit apo jo? A nuk është e mrekullueshme kur dikush ju jep një libër të ri, ndoshta për ditëlindje, dhe ndërsa i kalon faqet, ju mund të shihni se është një histori aventurë shumë tërheqëse. Ju mezi prisni që të uleni në një kolltuk dhe të filloni të hyni në botën e aventurave! E po mirë, sot në orën tonë të mësimit ne do të fillojmë një libër të mrekullueshëm të Biblës. Quhet “Libri i Romakëve”.

### Piktura I-1

A mund të ma thuash se kush e shkroi këtë libër? Mendo mirë, sepse ka me të vërtetë dy përgjigje. Po, apostulli Pal e ka shkruar disa vjet pasi Zoti Jezus vdiq, u ringjall dhe u kthye në qiell, ndoshta rreth vitit 57 pas Kr. Titulli i plotë i librit është “Letra e Palit ndaj Romakëve”. Epistull do të thotë “letër” dhe Pali ia shkroi atë të krishterëve në Romë. Ndoshta ai e shkroi atë nga Korinti, gjatë vizitës së tij të fundit atje.

Por si e dinte ai se çfarë duhet të shkruante në letër: Përgjigjja e mrekullueshme për këtë pyetje është që Perëndia e udhëhoqi atë me anë të Frymës së Tij të Shenjtë, në mënyrë që gjithçka të ishte plotësisht e saktë, pa asnjë gabim. Dhe çfarë ai shkroi në pergamenë ishte tamam ajo çfarë Perëndia donte t’u thoshte të krishterëve në Romë dhe ne gjithashtu. Të gjithë shkrytarët e Biblës kanë shkruar në këtë mënyrë, të udhëhequr përsosmërisht nga Perëndia ose siç themi ne “të frymëzuar nga Perëndia” (2 Timoteut 3:16; 2 Pjetër 1:21). Për këtë arsye ne e quajmë Biblën “Fjalën e Perëndisë”. Të gjithë librat e tjerë janë shkruar nga njerëzit. Bibla është i vetmi libër autori i të cilit është Vetë Perëndia. Kështu, në një farë mënyre libri i Romakëve është shkruar nga Pali; por në një mënyrë shumë më të mrekullueshme, ai është shkruar nga Vetë Perëndia. Çfarë na thotë Perëndia në këtë libër? Ne do ta

zbulojmë këtë sot dhe në takimet e tjera të ardhshme.

### Piktura I-2

Në tre kapitujt e parë të kësaj letre ndaj të krishterëve të Romës, Pali, i udhëhequr nga Fryma e Shenjtë, shpjegon se ka një skenë gjyqi më të madh. Nuk e di nëse keni parë ndonjëherë një program televiziv apo keni lexuar rreth dikujt në një gjyq, që akuzohet për një krim? Unë jam i sigurt se po. Ja ku është personi i akuzuar për vjedhje duke hyrë me forcë në shtëpi ose duke e sulmuar atë. Disa persona sillen në gjyq për të treguar se çfarë dinë ose çfarë kanë parë nga krimi: këta njerëz quhen dëshmitarë. Ndoshta disa prej tyre e kanë parë në fakt personin duke kryer krimin. Është edhe një avokat që përpiket të provojë se personi nuk e ka kryer krimin. Kemi edhe gjyqtarin, që duhet të vendosë nëse personi i akuzuar është fajtor për krimin, apo është i pafajshëm.

Gjyqtarët janë zakonisht njerëz të drejtë, që marrin vendime të urta pasi u janë paraqitur të gjitha provat. Por herë pas here ata mund të bëjnë ndonjë gabim dhe mund të lënë të lirë atë që është fajtor, ose madje mund të dënojnë një të pafajshëm duke menduar se ai ka bërë krim të rëndë. Gjyqtarët janë njerëz dhe nuk e kuptojnë gjithnjë se çfarë ndodh. Në disa vende gjyqtarët janë mizorë dhe të pandershëm dhe i dënojnë me dashje të pafajshmit, sepse kanë marrë fshehurazi dhurata.

Pali shpjegon në librin e Romakëve që ka një gjyq shumë më të madh se ai që mund të shihni në televizor ose për të cilin mund të lexoni në gazeta. A e dini se kush është ky Gjykatës? Është Perëndia. Dhe kush është personi që qëndron para Tij, për të dëgjuar vendimin që Ai do të marrë? Secili prej nesh-çdo njeri në botë qëndron përpara Perëndisë.

Megjithatë, Perëndia nuk është si një gjykatës njerëzor, që nuk i njeh gjithnjë të gjitha faktet. Perëndia i di në mënyrë absolute të gjitha gjërat që ti dhe unë kemi bërë. Ti nuk mund t’i fshehësh asgjë Perëndisë. Ndonjëherë ti mund t’ia fshehësh mësuesit tënd ose prindit, por Perëndia mund të shohë edhe në

thellësitë e zemrës tënde. Bibla thotë (mësues, le të lexojnë fëmijët Romakëve 2:16), "Perëndia do të gjykojë të fshehtat e njerëzve me anë të Jezus Krishtit". Kjo do të thotë që Perëndia do të shqyrtojë veprimet e çdo njeriu që ka jetuar ndonjëherë. Edhe veprimet tuaja të fshehta do të provohen. Jezus Krishti do ta ketë pushtetin që të dënojë të gjithë ata që janë fajtorë. Perëndia është përsosmërisht i drejtë dhe nuk mund të bëjë gabime. Prandaj, ndërsa qëndrojmë para Tij për të dëgjuar vendimin e Tij rreth nesh, ti dhe unë mund ta dimë se është i vërtetë dhe i drejtë në çdo kohë.

### Piktura I-3

Le të mendojmë për disa njerëz që ndodhen në një vend të largët, si për shembull në xhunglat e Amerikës së Jugut. Ata nuk e kanë dëgjuar kurrë Biblën; ndoshta ata nuk e kanë dëgjuar kurrë Perëndinë e vetëm të vërtetë; ata nuk kanë qenë asnjëherë në një kishë. Ne mund të pyesim veten:

A janë ata njerëz të mirë?  
A e kënaqin Perëndinë?  
A janë të denjë për të shkuar në qiell?  
A janë ata mëkatarë apo janë të pafajshëm?

Nëse do të merrnim mendimin e shumë njerëzve përreth nesh, ata do të thoshin, "Natyrisht ata janë të pafajshëm. Ata mundohen të jetojnë sa më mirë. Perëndia sigurisht që nuk pret nga ata që të jetojnë më mirë se kaq."

Le ta dëgjojmë se çfarë thotë Perëndia, Ai që është Gjykatësi i pagabueshëm. Perëndia thotë se ata janë fajtorë (mësues, le të lexojnë fëmijët Romakëve 1:20): "Ata nuk kanë justifikim." A është kjo e mundur? Po, dhe Pali e shpjegon pse ata janë fajtorë.

Perëndia është Krijuesi i gjithçkaje - i yjeve, detit, qiellit, detit, maleve, pemëve, luleve. Kur ne shohim të gjitha mrekullitë e kësaj bote të madhe, Perëndia na flet. Është sikur Ai të na thotë, "Ja, ju nuk mund të më shikoni, apo jo? Por ju mund të shihni të gjitha gjërat e mrekullueshme që unë kam bërë. Duke i parë ato ju mund ta dini që unë jam një Perëndi i madh dhe i

fuqishëm. Megjithëse unë jam i padukshëm (ju nuk mund të më shihni Mua), ju duhet të më lavdëroni Mua (të njihni fuqinë time të madhe). Ju duhet të më lavdëroni dhe të më falënderoni për gjithçka që kam bërë." Por njeriu nuk e bën këtë (mësues, le të lexojnë fëmijët Romakëve 1:21): "Sepse, megjithëse e njohën Perëndinë, nuk e përlëvduan as e falënderuan si Perëndi, përkundrazi u bënë të pamend në arsyetimet e tyre dhe zemra e tyre pa gjykim u errësua."

Kjo do të thotë që njeriu u bë krenar dhe u largua edhe më shumë nga Perëndia. Në vend që të adhuronin Perëndinë e madh, të vërtetë, të padukshëm, njeriu bëri shëmbëlltyra prej druri dhe kafshë të gdhendura me gur duke i quajtur "perëndi". Prandaj Perëndia i vërtetë dhe i gjallë thotë që ata janë fajtorë. Ata nuk kanë justifikim për paditurinë dhe mosbindjen e tyre. Ata nuk mund të shkojnë në parajsë ashtu siç janë.

Disa prej jush janë djem dhe vajza të krishtera dhe e doni me të vërtetë Zotin. A ndjeheni të trishtuar kur mendoni për ata njerëz të mjerë në gjithë botën që janë duke mëkatuar kundër Perëndisë? A e kuptoni që ata nuk mund të shkojnë në parajsë nëse nuk e dëgjojnë ungjillin? A nuk do të ishte e mrekullueshme nëse një ditë ti mund të bëhesh një misionar për t'ua sjellë atyre Fjalën e Perëndisë! A jeni të gatshëm që të shkoni kudo për hir të Tij? Nëse po, thuajini Atij që jeni gati. Kur Perëndia na e bën të qartë që këta njerëz janë mëkatarë fajtorë, të shkëputur prej Tij, Ai do të na nxisë që të bëjmë gjithçka që mundim për t'u sjellë atyre Ungjillin.

### Piktura I-4

Ndoshta disa njerëz në Romë, që po lexonin letrën që u ishte dërguar nëpërmjet Apostullit Pal, mendonin, "Po, është e vërtetë; ka shumë njerëz në botë që nuk e njohin Perëndinë e vërtetë, por ne Judenjët jemi të ndryshëm." (Lexoni Romakëve 2:17) "Ja, ti quhesh Jude, bazohesh mbi ligjin dhe lëvdohesh në Perëndinë." Pali po shkruante rreth Judenjve, që mendonin se besimi i tyre i rregullonte ata me Perëndinë. Ata ishin duke thënë, "Ne e njohim Perëndinë dhe ne kemi Shkrimet e Dhiatës së Vjetër. Ne

jemi të pafajshëm, dhe ne jemi duke shkuar në parajsë. Perëndia është shumë i kënaqur me ne.” Çfarë thotë Perëndia, Gjykatësi i madh, i vërtetë dhe i ditur rreth Judenjve? Ai thotë, “Edhe ata janë fajtorë.” (Lexoni Romakëve 3:9): “Si Judenjtë ashtu edhe Grekët janë të gjithë nën mëkat.” Pse Perëndia shpall që edhe Judenjtë janë fajtorë? Sepse ata e kanë Fjalën e Perëndisë por nuk i binden. (Lexoni Romakëve 2:13).

Ka misionarë që punojnë me Judenjtë, duke iu shpjeguar atyre se nëse besojnë në Zotin Jezus si Shpëtimtarin e tyre ata mund të shpëtojnë. Ju djem dhe vajza të krishtera mund të ndihmoni për t’a sjellë Ungjillin tek Judenjtë ndërsa luteni për ta dhe jepni për misionarët që punojnë me ta. Unë kam këtu një fletë të vogël me kërkesa lutje nga një misionar që punon me Judenjtë. Nëse dëshironi të luteni për ta, ejani tek unë pas mësimit dhe unë do t’ju flas më shumë rreth tyre dhe do t’ju jap këtë fletë, që ju të luteni në shtëpi për këtë shërbesë të mrekullueshme.

### **Piktura I-5**

Ndërsa Perëndia e sheh këtë botë të madhe Ai trishtohet shumë sepse burra dhe gra, djem dhe vajza nuk i binden Atij dhe nuk bëjnë atë që është e drejtë. Nuk ka rëndësi se nga ç’vend vini-Brazili, Meksika, Kina, Nigeria, Franca ose Irlanda. Nuk ka rëndësi nëse jemi të pasur ose të varfër, të vegjël ose të mëdhenj. Dëgjoni se çfarë thotë Perëndia për secilin prej nesh (Lexoni Romakëve 3:10,23): “Nuk ka asnjëri të drejtë, as edhe një.” “Të gjithë mëkatuan dhe u privuan nga lavdia e Perëndisë.” Kjo do të thotë që ne nuk jemi aq të pastër dhe të përkryer sa Perëndia do që të jemi. Perëndia na e ka treguar rrugën e duhur për të jetuar-ta duam Atë me të gjithë zemrën tonë dhe t’i duam të tjerët si veten. Megjithatë ne shpesh duam gjëra të tjera si televizorin, sportet, paratë, ose edhe shokët tanë më shumë se duam Perëndinë. E nuk i duam as të tjerët ashtu si duhet. Mendo për gjëra të gabuara që ti ke bërë: urrejtje për një djalë ose vajzë tjetër që zien brenda jush; fjalë rebelimi që ia ke thënë nënës; mendime të pista që të sjell në mendje. Po, Perëndia i sheh të gjitha. Ti e di se

çfarë thotë Perëndia është e vërtetë. Ai shpall që edhe ti je fajtor dhe meriton të ndëshkohesh. Por Perëndia nuk do që të të ndëshkojë për mëkatet e tua. Është e vërtetë që Ai është i shenjtë e i pastër dhe urren mëkatën, por Ai gjithashtu të do dhe dëshiron të të falë. Ai e dha Birin e Tij, Zotin Jezus, që të vdiste për mëkatet e tua dhe sot nëse ti kthehesh nga mëkatet e tua, dhe pranon Krishtin si Shpëtimtarin tënd, ti mund të falesh nga Perëndia.

Nëse ti ke qenë i shqetësuar për mëkatën tënd, dhe do që Perëndia të të falë, por ndoshta nuk jeni i sigurt se si mund të falesh, mund të qëndrosh pas mësimit pasi të tjerët kanë dalë jashtë. Vetëm eja dhe ulu në një nga këto karrige në radhën e parë dhe atëherë unë do ta di se ju kërkon ndihmë prej meje. Unë do të jem këtu pranë tryezës dhe do t’ju tregoj me kënaqësi se si mund ta pranosh faljen e Perëndisë sot.

Por si mund të jetë Perëndia i shenjtë dhe i drejtë dhe megjithatë të na falë? Le t’jua shpjegoj duke përdorur një histori që nuk ndodhet në Bibël.

### **Piktura I-6**

Na ishin dy vëllezër që quheshin Kevin dhe Xhek Metjus. Ata ishin shumë të lidhur me njeri tjetrin dhe luanin shumë së bashku. Por ata edhe grindeshin disa herë siç ndodh me vëllezërit. Me kalimin e viteve, ata u rritën dhe morën drejtime krejt të ndryshme në jetët e tyre. Xheku studioi shumë në shkollë, i mori provimet dhe shkoi në universitet dhe më në fund u bë një gjykatës. Ai ishte një gjykatës i mirë e i drejtë dhe u bë i famshëm në gjithë vendin. Ai u bë edhe i pasur dhe ndërtoi një shtëpi të bukur ku jetoi me gruan dhe familjen e tij.

Kurse Kevin, vëllai tjetër, ishte shumë dembel. Ai nuk donte t’ia dinte për shkollën dhe nuk e kaloi klasën. Pasi e la shkollën ai hyri në disa punë që nuk i mbajti dot se ishte shumë dembel. Një ditë ai e humbi një punë dhe kështu për të fituar para filloi të vidhte. Fillimisht ai vodhi gjëra të vogla, por pastaj arriti deri aty sa një ditë vodhi një shumë të madhe parash (500 paund ose 1.000.000 lekë) nga Zyrat e Postës; por disa persona e panë atë dhe

më vonë e kapi policia. E çuan në gjyq ku ai u akuzua si hajdut.

### Piktura I-7

Kur Kevin u soll përpara gjykatësit, ai ngriti sytë dhe u befasua kur pa se gjykatësi ishte vëllai i tij Xhek. Edhe gjykatësi e vuri re se ai person që kishte para vetes ishte i vëllai Kevin. Edhe disa të tjerë në sallën e gjyqit e vunë re që ishin vëllezër sepse natyrisht ata kishin të njëjtin mbiemër, Metjus dhe disa njerëz filluan t'u pëshpëritnin të tjerëve, "Çfarë do të ndodhë tani?"

Dëshmitarët shpjeguan çfarë kishin parë. Policët paraqitën provat që kishin gjetur. Xheku, gjykatësi, po vriste mendjen se çfarë duhet të bënte: "Është e qartë se Kevin është fajtor për këtë krim: çfarë duhet të bëj? A do ta lë të lirë se është vëllai im? Jo, unë nuk mund ta bëj këtë. Unë jam gjykatësi dhe duhet të jem i drejtë. Unë duhet t'i ndëshkoj keqbërësit. A do ta ndëshkoj atë siç e meriton? Por si mund ta bëj këtë ndaj vëllait tim të cilin e dua aq shumë?"

Të pranishmit në sallën e gjyqit po prisnin për të dëgjuar se çfarë do të thoshte gjykatësi. Në fund të gjyqit gjykatësi i tha Kevinit, "Unë të shpall fajtor dhe të urdhëroj që të paguash një dëmshpërblim prej 500 paund ose të futesh në burg për 5 muaj." Një murmurimë u dëgjua nga ata që po dëgjonin sepse iu duk se ishte një dënim i rëndë. Ata e dinin se Kevinin nuk mund ta paguante atë shumë. Por në atë çast gjykatësi u ngrit dhe shkoi tek vëllai i tij. Ai nxori nga kuletat shumë e nevojshme dhe e dorëzoi atë. Tani Kevin mund të shkante i lirë sepse vëllai i tij që e donte atë kishte paguar shumë e duhur të ndëshkimit.

Perëndia e ka bërë këtë, dhe shumë më tepër për ne. Në letrën drejtuar

Romakëve Pali shpjegon sesi Perëndia mund të jetë **i drejtë dhe besnik** në dënimin e mëkateve tona, dhe megjithatë e tregon dashurinë e Tij duke na falur (lexoni Romakëve 3:26): "Për të treguar drejtësinë e tij në kohën e tanishme, me qëllim që ai të jetë i drejtë dhe shfajësues i atij që ka besimin e Jezusit." Perëndia e tregoi sesa i drejtë është Ai që e dënoi mëkatin tonë: Ai pagoi për mëkatin tënd, kur Ai e vuri ndëshkimin mbi Birin e Tij, Zotin Jezus. Tani kur ti e vendos besimin tënd në Zotin Jezus Krisht, Ai do të të shpallë të drejtë në sytë e Tij.

### Piktura I-8

Para së gjithash Perëndia tha për secilin prej nesh, "Ti je një mëkatar rebel. Ke bërë shumë gjëra të gabuara. Ke shkelur ligjet e mia që të kam dhënë në Bibël dhe meriton të ndëshkohesh, të vdesësh dhe të largohesh prej meje përgjithnjë." Por pastaj Perëndia e mori Vetë ndëshkimin. Ai e dha Birin e Tij të dashur, Zotin Jezus që të vdiste në kryq për mëkatet tona. Ashtu si gjykatësi Ai pagoi një ndëshkim të tmerrshëm, sepse na deshi aq shumë. Tani që Zoti Jezus e ka paguar të gjithë ndëshkimin për ne në kryq, Perëndia mund të na falë. Kjo është e ngjashme me atë që Xheku mund të bënte, kur e la Kevinin të lirë, edhe pse vëllai i tij ishte një hajdut dhe keqbërës.

Nëse nuk je kthyer ende nga mëkatet e tua tek Perëndia, i kërkoi tani Atij që të të falë dhe të të pastrojë nga të gjitha mëkatet e tua. "Perëndia do të gjykojë të fshehtat e njerëzve." Beso në Zotin Jezus që të jetë Shpëtimtari yt, që të lirohesh nga ndëshkimi. Mos e shty më këtë vendim të rëndësishëm. Kujto se je fajtor para Perëndisë dhe se ke nevojë për faljen e Tij. Merre faljen e Tij sot!

### Konkurs Përsëritës bazuar mbi Mësimin 1

1. Kush ishte ai që e shkroi letrën ndaj Romakëve? (8 horizontalisht)
2. Çfarë bëri Perëndia që Pali të shkruante me saktësi ato gjëra që Perëndia donte prej të krishterëve në Romë të lexonin? (5 vertikalisht)
3. A janë johebrenjtë (paganët) të pafajshëm apo fajtorë para Perëndisë? (4 horizontalisht)
4. Edhe Judenjtë janë fajtorë sepse megjithëse ata kishin Shkrimet e Dhiatës së Vjetër, ata nuk \_\_\_\_\_ atyre (3 vertikalisht)
5. Plotësoni këtë varg: "Të gjithë \_\_\_\_\_ dhe u privuan nga lavdia e Perëndisë." (10 horizontalisht)
6. Perëndia është Gjykatësi i gjithë botës. Ai është i gjithë ditur dhe plotësisht \_\_\_\_\_ (7 vertikalisht)
7. Perëndia është i drejtë, por Ai është gjithashtu një Perëndi që është plot me \_\_\_\_\_ për ne. (2 horizontalisht)
8. Ju e dëgjuat historinë e 2 vëllezërve: njëri quhej Xhek dhe tjetri \_\_\_\_\_ (11 horizontalisht)
9. Xheku, gjykatësi i drejtë, zbatoi një ndëshkim shumë të rëndë mbi vëllain e tij Kevin, por pastaj çfarë bëri ai? Ai pagoi \_\_\_\_\_ (9 vertikalisht)
10. Perëndia është gjykatësi i drejtë i të gjithë botës. Çfarë ndëshkimi të tmerrshëm mori Ai mbi vete për ne? Ai dha Birin e Tij që të \_\_\_\_\_ në \_\_\_\_\_ (6 horizontalisht)

Përgjigjet e pyetjeve 1 deri 10 që ndodhen më lart:

Pali (1 vertikalisht horizontalisht) frymëzoi (5 vertikalisht) fajtorë (5 horizontalisht) bindën (2 vertikalisht) mëkatuan (7 vertikalisht t) i drejtë (8 horizontalisht) dashuri (3 horizontalisht) Kevin (11 horizontalisht) dëmshpërblimin (9 vertikalisht) vdiste (1 vertikalisht) kryq (6 horizontalisht)

### Vargje për Mësimin I

- Romakëve 1:20 Në fakt cilësitë e tij të padukshme, fuqia e tij e përjetshme dhe hyjnia e tij, duke qenë të dukshme nëpërmjet veprave të tij që nga krijimi i botës, shihen qartë, me qëllim që ata të jenë të pajustificueshëm.*
- Romakëve 1:21 Sepse, megjithëse e njohën Perëndinë, nuk e përlëvduan as e falënderuan si Perëndi, përkundrazi u bënë të pamend në arsyetimet e tyre dhe zemra e tyre pa gjykim u errësua.*
- Romakëve 2:13 Sepse jo ata që dëgjojnë ligjin janë të drejtë para Perëndisë, por ata që e zbatojnë ligjin do të shfajësohen.*
- Romakëve 2:16. Perëndia do të gjykojë të fshehtat e njerëzve me anë të Jezus Krishtit, sipas ungjillit tim*
- Romakëve 2:17 Ja, ti quhesh Jude, bazohesh mbi ligjin dhe lëvdohesh në Perëndinë*
- Romakëve 3:9 E çfarë pra? A kemi ne ndonjë epërsi? Aspak! E kemi treguar në fakt që më përpara sesi Judenjtë ashtu edhe Grekët janë të gjithë nën mëkat.*
- Romakëve 3:10 Siç është shkruar: Nuk ka asnjëri të drejtë, as edhe një.*
- Romakëve 3:23 Sepse të gjithë mëkatuan dhe u privuan nga lavdia e Perëndisë*
- Romakëve 3:26 Për të treguar drejtësinë e tij në kohën e tanishme, me qëllim që ai të jetë i drejtë dhe shfajësues i atij që ka besimin e Jezusit."*



# Mësimi II

## Gjykatësi ju shpall të drejtë me ligjin

**Pasazhi Biblik:** Romakëve 3:21-5:9

**E Vërteta Qendrore:** (VQ) Sepse Zoti Jezus e dha gjakun e Tij për mëkatarët, Perëndia i shpall të drejtë të gjithë ata që i besojnë Atij.

**Zbatimi për të pashpëtuarit:** (VQP) Mos e vendos besimin në veprat e tua të mira, por mbështetuni vetëm te Krishti për t'ju shpëtuar.

**Zbatimi për të shpëtuarit:** (VQSH) Falënderoje Perëndinë që Ai të shoh të pastër dhe të dëlirë, pasi Zoti Jezus ka vdekur për ty.

**Vargu Përmendësh:** “Të shfajësuar, pra, me anë të besimit, kemi paqe me Perëndinë nëpërmjet Jezus Krishtit, Zotit tonë” (Romakëve 5:1)

### Skema:

- Hyrja: Përsëritje e historisë së Xhekut dhe Kevinit nga mësimi 1.
- Piktura II-1: Ne nuk mund ta shfajësojmë veten me anë të “veprave të ligjit”. VQP
- Piktura II-2: Baza e shfajësimit tonë është **gjaku** i derdhur i **Krishtit**.
- Piktura II-3: **Efekt** i shfajësimit tonë është **drejtësia e Krishtit që na numërohet**. VQSH
- Piktura II-4: **Mjeti** i shfajësimit tonë është **besimi** në Krishtin. VQP
- Piktura II-5: **Shembulli biblik** sesi **Abrahami** u shfajësua kur ai i besoi Perëndisë.
- Piktura II-6: Ilustrimi i Tomit që lundron mbi një dyshek gome që rrjedh ujë nga një vrimë.
- Piktura II-7: Rikardi vjen për ta shpëtuar; Tomi përpiqet vetë, por më në fund i beson rojes detare dhe shpëtohet. VQP
- Piktura II-8: Zbatimi i fundit: A i keni besuar Perëndisë për shpëtim? VQP

### Shënim:

Pali trajton tek Romakët edhe **burimin** e shfajësimit tonë, që është **hiri** i Perëndisë. Ky aspekt nuk trajtohet specifikisht gjatë mëimit që të mos jetë shumë intensiv për fëmijët.

### Aktivitete të lidhura:

**Një Dramë:** Vendosni pjesët për skenat 4 dhe 5 të skeçit: pjesët e reja janë “Xheni” dhe “Meri”. Vazhdoni të lexoni dhe të përsërisni.

**Një Konkurs Përsëritës:** Pyetje dhe udhëzime për vizualin gjëgjëzë janë të përfshira në fund të këtij mësimi.

## Mësimi

### Hyrja

(Ju mund të shfaqni Figurën I-7)

A ju kujtohet historia e dy vëllezërve- Kevin dhe Xhek? Çfarë kishte bërë Kevin? (Kishte vjedhur para.)

A shpalli gjykatësi që Kevin ishte fajtor, apo i pafajshëm? (Fajtor.) Ashtu është! Dhe para Perëndisë, Gjykatësit të

madh, të gjithë jemi fajtorë, sepse ti dhe unë kemi shkelur ligjet e Tij.

Le të përfytyrojmë në historinë tonë që kur gjykatësi e dënoi atë me një shumë prej 500 paund ose të futej në burg, Kevin të kishte thënë, “Të lutem mos më ndëshko; unë do të sillem mirë që tani e tutje.” A mendoni se gjykatësi do të kishte thënë, “E po mirë atëherë, ti mund të lrohesh”? Çfarë mendoni? Përgjigjja është “jo”. Gjykatësi nuk mund ta lironte atë, pasi ai kishte shkelur ligjin dhe ishte detyra e gjykatësit që ta ndëshkonte atë patjetër për krimin që kishte bërë.

### Piktura II-1

Kjo vlen edhe për ty dhe për mua ndërsa ne qëndrojmë para Perëndisë. Perëndia është gjykatësi i drejtë i gjithë botës. Nuk do të ishte e drejtë nëse Perëndia do t’u thoshte mëkatarëve, “Oh, nuk ka rëndësi! Vetëm mos e bëj më!” Askush nga ne nuk mund t’i thoshte Perëndisë, “Që tani e tutje unë do të sillem mirë dhe nuk do t’i shkel më ligjet e tua.” A e dini pse ne nuk mund t’ia themi këtë Perëndisë? Sepse ju dhe unë kemi një natyrë mëkatore: ne kemi lindur me diçka në zemrat tona që na bën të duam të bëjmë të keqen; prandaj ne shpejt e gjejmë veten duke mëkatuar kundër Perëndisë.

Ka shumë njerëz që mendojnë se duke bërë gjëra të mira ata mund të shpëtohen nga mëkatet e tyre dhe mund të shkojnë në parajsë. Pali na tregon në letrën e tij ndaj Romakëve që ata përpiqen të rregullohen me Perëndinë me anë të “veprave të ligjit”: ata mundohen të jenë të mirë dhe të dashur, ndihmues dhe bujarë. Por Ai na thotë në Fjalën e Tij që ne nuk mund t’i heqim mëkatet tona duke qenë të mirë. Ne nuk mund të rregullohemi me Perëndinë në këtë mënyrë. (*Lexoni Romakëve 3:20*): “Sepse asnjë mish nuk do të shfajësohet para tij për veprat e ligjit.” Kjo do të thotë që askush nuk mund të rregullohet me Perëndinë duke qenë i mirë dhe duke u përpjekur që të zbatojë urdhërimet e Perëndisë.

### Piktura II-2

A ju kujtohet sesi Kevin mundi të dilte i lirë nga salla e gjyqit atë ditë? Ndërsa ai ecte atë ditë në rrugë, askush nuk mund t’i thoshte atij, “Ti s’mund të largohesh se duhet të paguash shumë ndëshkuese!”

“Jo,” mund të përgjigjej ai, “Ajo është paguar tashmë dhe unë nuk duhet ta paguaj më atë.” Pse mund të thotë Kevin tani, “Unë nuk mund të ndëshkohem për atë krim”? Sepse Xheku, gjykatësi, erdhi pranë tij dhe e pagoi shumë për të. Kevin ishte në rregull me ligjin sepse shuma e ndëshkimit ishte paguar.

Po ashtu ne mund ta dimë tani se çfarë do të thotë të jesh i lirë nga ndëshkimi i mëkatit tonë. Perëndia mund të na thotë, “Ju jeni në rregull me Ligjin Tim.” Ky është kuptimi i fjalës “shfajësoj”. Do të thotë të shpallësh që dikush nuk është fajtor, por është në rregull me ligjin. Si mund të na shfajësojë Perëndia? Ne e gjejmë përgjigjen në Fjalën e Perëndisë (*lexoni Romakëve 5:9*): “Duke qenë tani të shfajësuar në gjakun e tij, do të shpëtojmë nga zemërimi me anë të tij.” Ndëshkimi për mëkatet e tua është paguar në kryq, kur Perëndia e dha Birin e Tij që të vdiste në kryq. Ti meriton të ndahesh nga Perëndia përgjithnjë. Çmimi i çlirimit tënd nga ky ndëshkim ishte gjaku i çmuar i Zotit Jezus, vdekja e Tij për ty. Çmimi është paguar plotësisht, sepse Ai e mori të gjithë ndëshkimin për mëkatet tona. Në fund Ai thirri, “U krye” që do të thotë saktësisht “është paguar plotësisht.” Nëpërmjet Krishtit ne nuk duhet të paguajmë më për mëkatet tona. Nëse ti i beson Atij, atëherë ti nuk mund të ndëshkohesh më sepse je i shfajësuar. A të kujtohet se çfarë do të thotë kjo? (*Le të përgjigjen fëmijët.*)

Po, do të thotë që Perëndia të shpall të pafajshëm, në rregull me ligjin, kur beson në Krishtin.

### Piktura II-3

Zoti Jezus ishte i Vetmi që mund të paguante për ne, sepse vetëm Ai që e respektonte ligjin e Perëndisë përsosmërisht; Ai bënte vepra të mira; Ai e donte gjithnjë Perëndinë dhe i donte të tjerët; fjalët dhe mendimet e Tij ishin gjithnjë të mira dhe të vërteta. Çdo njeri

tjetër përveç tij ka mëkatuar dhe është fajtor në sytë e Perëndisë. Askush tjetër nuk mund të paguajë për ne. Zoti Jezus gjithnjë i bindej urdhërimeve të Perëndisë dhe tani nëse ju i besoni Atij, mirësia e Tij iu numërohet juve. Kjo do të thotë që në sytë e Perëndisë është sikur ne të kemi jetuar jetën e përsosur të Zotit Jezus. Kur Perëndia na sheh Ai nuk shikon të gjitha mëkatet tona. Ai sheh vetëm gjërat e përkryera që ka bërë Jezusi. Pali shkruan për Abrahamin (*lexoni Romakëve 4:22*): “Kjo iu numërua atij për drejtësi.” Kjo do të thotë që Abrahami numërohej si i përkryer dhe i drejtë nga Perëndia. Kjo është çfarë na ndodh kur ne besojmë në Zotin Jezus Krisht.

Kur Perëndia na shfajëson, Ai **nuk** na i bën menjëherë jetët të pastra dhe të përkryera. (*Ne do ta shohim në mësimin tonë të ardhshëm sesi Ai na bën të ndryshëm.*) Po ashtu edhe gjykatësi nuk e bën të mirë personin që ka kryer faj; ai thjesht thotë që ai është në rregull me ligjin, nuk është fajtor. Kur Perëndia na shfajëson, drejtësia e përsosur e Zotit Jezus na numërohet. Nëse ti je një besimtar, ti duhet ta lavdërosh Zotin që Ai të sheh ty tani sikur të kesh jetuar jetën e përsosur të Zotit Jezus. A e keni falënderuar Atë për këtë? Bëjeni këtë që tani në qetësinë e zemrave tuaja!

#### Piktura II-4

A do të thotë kjo që çdo njeri do të shkojë në parajsë? A ka vendosur Perëndia që çdo njeri është i falur, sepse Jezusi ka vdekur në kryq? A është çdo njeri i “shfajësuar” në sytë e Perëndisë tani? Çfarë mendoni? (*Mësues, le të përgjigjen fëmijët.*) Jo, të gjithë janë duke shkuar në parajsë. Vetëm ata që me besim e kanë pranuar dhuratën e faljes nga Perëndia (*lexoni Romakëve 3:28*): “Njeriu është i shfajësuar **nëpërmjet besimit** pa veprat e ligjit.” Çfarë do të thotë kjo? Do të thotë që ju duhet t’i besoni plotësisht Krishtit për të marrë faljen e mëkateve tuaja. Ju nuk mund të bëni asgjë vetë për t’i rregulluar gjërat. Kjo është në një farë mënyre çfarë bëri Kevini. Ai e dinte se meritonte që të ndëshkohej; ai e dinte se nuk mund të paguante; dhe kështu ai e pranoi me mirënjohje dhuratën

e 500 £ që vëllai i tij kishte paguar, që ai të lirohej. Ai u mbështet tek vëllai i tij për të paguar çmimin e ndëshkimit të tij.

Po kështu ti duhet të vish tek Zoti Jezus dhe t’i thuash Atij, “Unë nuk mund ta rregulloj dot veten para Teje; unë nuk mund t’i largoj mëkatet e mia. Edhe sikur të përpiqesha t’i bëja të gjitha gjërat e mira që do të mundja, unë e di se prapë nuk do të mjaftonin. Por e di se Jezusi vdiq për të paguar ndëshkimin e mëkateve të mia. Faleminderit. Unë e pranoj tani dhuratën e faljes prej Teje.”

#### Piktura II-5

Disa njerëz në kohën e apostullit Pal nuk mund ta kuptonin sesi Perëndia mund të falte falas mëkatarët, pa pasur nevojë që ata të bënin vepra të mira, ose të paguanin para, ose të bënin gjëra për të kënaqur Perëndinë. Kështu Pali ka shkruar në këtë letër, “Mendoni rreth Abrahamit, sesi ai u shfajësua”- sesi ai u bë i drejtë në sytë e tij. Abrahami kishte jetuar me qindra vjet para se Zoti Jezus të vinte në tokë. Perëndia e thirri atë nga qyteti i Uzit ku ai jetonte dhe i premtoi atij që një ditë ai do të kishte shumë fëmijë dhe që do të zotëronte shumë toka. Ai i besoi Perëndisë dhe e la qytetin e tij. Ai tani nuk kishte asnjë shtëpi dhe asnjë tokë dhe nuk kishte asnjë djalë. Ai ishte i moshuar tashmë. Ai ishte një njeri i drejtë, por si të gjithë ne ai bënte mëkate. Më shumë se një herë ai tha gënjeshtër dhe mashtrroi njerëz. Një herë për shembull ai i tha mbretit të Egjiptit se gruaja e tij ishte motra e tij.

Megjithatë Perëndia shpalli se Abrahami ishte i drejtë. Si mund të ishte kjo e mundur? (*Lexoni Romakëve 4:3*): “Abrahami i besoi Perëndisë dhe kjo iu numërua për drejtësi.” Kjo do të thotë që ai i besoi gjithçkaje që Perëndia i kishte premtuar atij, dhe për këtë arsye Perëndia shpalli që ai ishte i drejtë në sytë e Perëndisë. Perëndia nuk e shihte atë si fajtor për mëkatet e tij: Perëndia e kishte shfajësuar atë.

Le të lexojmë Romakëve 5:1: “Të shfajësuar, pra, me anë të besimit, kemi paqe me Perëndinë nëpërmjet Jezus Krishtit, Zotit tonë.” Të jesh i shfajësuar

do të thotë të numërohesh nga Perëndia si i mirë dhe i drejtë. Kjo ndodh kur ti e vendos besimin tënd në Zotin Jezus Krisht.

### **Piktura II-6**

Unë dua të të tregoj një histori tjetër që shpresoj se do t'ju ndihmoj që të kuptoni gjithnjë e më mirë se çfarë do të thotë të jesh i shfajësuar **me anë të besimit**. Tomi po kalonte pushimet e tij verore në bregdet. Ai po kalonte një kohë të mrekullueshme, sepse dielli ndriçonte çdo ditë dhe ai mund të notonte. Atij i pëlqente të merrte kamerdaren e tij dhe të lundronte mbi dallgët e detit. Ishte aq qetë të rrije mbi të saqë ai shtrihej mbi shpinë, duke vështruar qiellin, ndërsa dysheku i detit lëkundej butësisht mbi ujë.

Por një ditë diçka e tmerrshme ndodhi. Papritur ajri filloi të dilte nga dysheku, dhe brenda pak çastesh ai nuk mund të lundronte më. Tomi e kishte punën pisk, sepse nuk dinte të notonte mirë. “Ndihmël!” thirri ai, “Ndihmël! Po mbytem.” Atë ditë në plazh ndodhej një roje shpëtimi që quhej Rikard që shikonte vazhdimisht me dylbitë e tij të fuqishëm, për të parë nëse kishte ndonjë nga njerëzit në det që ndodhej në rrezik. Ai e pa rrezikun e Tomit dhe dëgjoi zërin e tij të dobët që po kërkonte ndihmë. Rikardi i hodhi syzet, vrapoi drejt detit dhe u fut në të. Ai filloi të notonte me krahët dhe këmbët e tij të fuqishme derisa arriti aty ku Tomi i shkretë po mundohej të mbijetonte.

### **Piktura II-7**

Sapo roja e arriti atë, Tomi filloi të rrihte këmbët dhe duart duke dashur që të ndihmonte Rikardin për të notuar dhe për ta sjellë atë në breg. “Jo,” thirri Rikardi, “Ti po e bën më të vështirë që unë të të shpëtoj jetën tënde. Mos u mundo më që të shpëtosh veten por vetëm rri aty ku je pa lëvizur dhe më beso. Unë do të të shpie në breg.” Tomi e bëri këtë dhe roja trupmadh dhe i fuqishëm u kthye me shpinë, duke e marrë atë mbi qafë dhe filloi të notonte drejt bregut. Ai kishte shpëtuar edhe të tjerë para tij dhe ai e dinte me saktësi se çfarë duhet të bënte. Shpejt ai u ndodh në ujëra të cekëta dhe

mund të prekte tokën. Ai e kapi Tomin, që ishte i lodhur, dhe e solli atë në rërën e ngrohtë. “Sa e mrekullueshme është të jesh shëndoshë e mirë në breg! mendoji Tomi, ndërsa qëndronte duke gulçuar në diell.

Po kështu Zoti do që ne të besojmë në Të. (*Lexoni Romakëve 4:5*): “Atij që nuk vepron, por beson në atë që shfajëson të paudhin, besimi i tij i numërohet për drejtësi.” Kjo do të thotë që ne nuk duhet të përpiqemi të shpëtojmë veten; ne duhet të besojmë vetëm në Zotin Jezus për të na bërë të drejtë me Perëndinë. Tomi i besoi rojës së fuqishëm të detit sepse nuk mund ta shpëtonte veten. As ne nuk mund ta shpëtojmë veten nga mëkati ynë. Në fakt, nëse përpiqemi, ne nuk e lëmë Perëndinë të na shpëtojë; kujtoni që përpjekjet e Tomit për të ndihmuar Rikardin e bënë në fakt më të vështirë shpëtimin e tij.

### **Piktura II-8**

Por Zoti Jezus bëri më shumë për ne sesa bëri Rikardi për Tomin. Rikardi e rrezikoi trimërisht jetën e tij; por Zoti Jezus e dinte kur erdhi për të na shpëtuar se Ai duhet të vdiste. Ai e dha jetën e Tij vullnetarisht.

Perëndia bëri më shumë sesa Xheku, gjykatësi, bëri për të vëllanë fajtor. Zoti Jezus nuk pagoi një shumë të tillë prej 500 paund por Ai pësoi ndëshkimin e tmerrshëm të vdekjes për ty dhe mua. Kur ne i besojmë Atij, ne kemi “paqe me Perëndinë, nëpërmjet Zotit tonë Jezus Krisht” (Romakëve 5:1). Ne e kemi këtë paqe me Perëndinë sepse mëkatet tona janë të falura; ne e kemi këtë paqe, sepse ne jemi të drejtë në sytë e Tij; ne e kemi këtë paqe, sepse jemi të sigurt dhe e dimë se do të shkojmë në qiell.

A i ke besuar Krishtit si Zotin dhe Shpëtimtarin tuaj? A ke paqe me Perëndinë? Sot Ai do që ti t'i besosh Atij. Kthehu nga mëkatet e tua dhe kërkoji Atij që të të falë dhe t'ju bëjë fëmijën e Tij.

### **Konkurs Përsëritës bazuar mbi Mësimin II**

Për mjetin viziv, përdorni figurën gjëegjëzë që ndodhet në fund të librit të

Pikturave. Mbështete mbi flanelobord për ta pasur gati për përdorim. Pritni 8 copat e puthitura. Kur një fëmijë i përgjigjet si duhet një pyetjeje, ai mund të vërë një copë të gjëegjzës në pozicionin e duhur në flanelobord.

1. Shpjegoni çfarë do të thotë fjala “shfajësoj” në Bibël? (Të shpallë që një person nuk është fajtor por është i drejtë me ligjin.)
2. Në mësimin tonë sot ne kemi parë një mënyrë të gabuar sesi njerëzit **përpiqen** të shfajësohen para Perëndisë. Cila është kjo rrugë e gabuar? (*Me anë të veprave të ligjit- duke u përpjekur për të bërë gjëra të mira për të shpëtuar veten.*)
3. Tek Romakëve 5:9 ne lexojmë që jemi të “shfajësuar” me anë të gjakut të Jezusit”-a mund ta shpjegoni këtë? (*Kur Jezusi vdiq në kryq dhe gjaku i Tij u derdh për ne, ndëshkimi për mëkatin tonë u pagua plotësisht.*)
4. Dhe tek Romakëve 5:1 ne lexojmë gjithashtu që jemi të “shfajësuar me anë të besimit”. A mund ta shpjegoni këtë? (*Vepra e Jezusit zbatohet tek ne vetëm kur ne i besojmë Atij.*)
5. a Kush ishte personi në Dhiatën e Vjetër që ne kemi studiuar i cili u “shfajësua” sepse ai besoi në Perëndinë? (*Abrahami*)  
b Nga cili qytet e thirri atë Perëndia? (*Uz*)
6. Në cilat premtime të Perëndisë besonte ai? (*Që ai do të kishte shumë pasardhës, dhe që do të kishte një vend.*)
7. Si e tregoi Tomi që e kishte vënë besimin e tij në rojën e shpëtimit? (*Ai ndaloi së përpjekuri dhe e lejoi Rikardin që ta shpëtonte atë.*)
8. Në ç’mënyrë është roja e shpëtimit një ilustrim i Zotit Jezus? (Ai ishte i fuqishëm dhe i aftë për të shpëtuar; ai kishte shpëtuar tashmë njerëz të tjerë; ai ishte i gatshëm që të sakrifikonte veten për të shpëtuar të tjerët.)

## Vargje për Mësimin II

- Romakëve 3:20 “Sepse asnjë mish nuk do të shfajësohet para tij për veprat e ligjit; me anë të ligjit në fakt arrihet njohja e mëkatit.”
- Romakëve 3:28 “Ne, pra, konkludojmë se njeriu është i shfajësuar Nëpërmjet besimit pa veprat e ligjit.”
- Romakëve 4:3 “Në fakt,, çfarë thotë Shkrimi? Por Abrahami i besoi Perëndisë dhe kjo iu numërua për drejtësi.”
- Romakëve 4:5 “Ndërsa atij që nuk vepron, por beson në atë që shfajëson të paudhin, besimi i tij i numërohet për drejtësi.”
- Romakëve 4:22 “Prandaj edhe kjo iu numërua atij për drejtësi.”
- Romakëve 5:1 “Të shfajësuar, pra, me anë të besimit, kemi paqe me Perëndinë nëpër-mjet Jezus Krishtit, Zotit tonë.”
- Romakëve 5:9 “Shumë më tepër, pra, duke qenë tani të shfajësuar në gjakun e tij, do të shpëtojmë nga zemërimi me anë të tij.”

# Mësimi III

## Miku më i Mirë

**Pasazhi Biblik:** Romakëve 6-8, veçanërisht kapitulli 8.

**E Vërteta Qendrore:** Fryma e Shenjtë jeton në çdo të krishterë për ta forcuar dhe ndihmuar atë.

**Zbatimi për të Shpëtuarit:** (VQSH) Besojini Atij që t'ju japë fitore mbi mëkatin dhe Satanin dhe t'ju largojë dyshimet dhe frikërat tuaja.

**Zbatimi për të Pashpëtuarit:** (VQP) Dëgjoni se çfarë Fryma e Shenjtë është duke thënë dhe ejani te Krishti.

Duke ndjekur strukturën e përgjithshme të librit të Romakëve, ky mësim ka të bëjë më shumë me mësimin rreth jetës së të krishterëve, sesa rreth rrugës së shpëtimit. Për fëmijët e pashpëtuar në klasën tuaj ju duhet të përfshini Ungjillin në një nga pjesët e para të programit para mësimi, duke e bazuar atë në vargjet që janë rreshtuar pak më poshtë. Fëmijët mund t'i nënvizojnë këto vargje në Biblat e tyre, nëse i kanë ato, dhe shkruajini këto fjalë pranë referencave për t'i ndihmuar ata që të kujtojnë:

Romakëve 3:23

Nevoja jonë

Romakëve 5:8

Shpëtimtari i

vetëm

Romakëve 6:23

Dhurata e

Perëndisë

Romakëve 10:13

Çfarë duhet

të bëjmë

**Vargu Përmendësh:** Përsëritni Romakëve 5:1

**Skema:**

Hyrja: Përsëritje e shkurtër e historisë së Xhekut, gjykatësit

Piktura III-1

Piktura III-2

Piktura III-3

Piktura III-4

Piktura III-5

Piktura III-6

Piktura III-7

Piktura III-8

dhe vëllait të tij Kevin.

Mirënjohja e Kevinit ndaj Xhekut

Mirënjohja jonë ndaj Perëndisë duhet të tregohet nga mënyra sesi ne i ndihmojmë dhe u bindemi prindërve tanë.

Fryma e Shenjtë na ndihmon për t'iu bindur urdhërimeve të Perëndisë (Romakëve 8:4)-shembulli i Sandrës. VQSH

Satani përpiqet t'i bëjë të krishterët të dyshojnë, por Fryma e Shenjtë na siguron që ne jemi bij të Perëndisë (Romakëve 8:16)

Ai përdor premtimet e Perëndisë dhe jetët tona të ndryshuara për të na dhënë siguri-shembulli i Sandrës. VQSH

Fryma e Shenjtë na udhëheq në vendimet tona (Romakëve 8:14).

Ai na udhëheq nëpërmjet leximit të Biblës dhe lutjes, paqes së Tij në zemrat tona, dhe të krishterëve të tjerë.

Fryma e Shenjtë na ndihmon që të lutemi si duhet (Romakëve 8:26). Ai u tregon të pashpëtuarve mëkatin e tyre-për t'i sjellë te Krishti. VQP

**Aktivitete të lidhura:**

a. Jepuni fëmijëve nga një fletë letre të ndarë siç tregohet më poshtë. (Ju mund të përgatitni një të tillë dhe të

bëni fotokopje.) Kërkojini secilit fëmijë që të vizatojë tre Piktura të përshtatshme-si mund t'ia shfaqë dashurinë e tij Zotit në shtëpi, në shkollë dhe në lojë. Kjo është e përshtatshme edhe për nxënësit e pashpëtuar. U shpjegon atyre disa prej nënkuptimeve të konvertimit dhe i përgatit ata që të kthehen me të vërtetë te Krishti.

Nëse Perëndia na ka shfajësuar; ne duhet t'i shfaqim Atij dashurinë dhe mirënjohjen tonë.		
Në shtëpi	Në shkollë	Me shokët tanë

b. Vazhdoni të mësoni dhe të bëni prova me dramën.

Në këtë klasë e di se ka disa djem dhe vajza që janë në familjen e Perëndisë. Ti i ke besuar Jezus Krishtit si Zotin dhe Shpëtimtarin tënd. Perëndia ka bërë më shumë për ty sesa Xheku bëri për Kevinin sepse Ai dha Birin e Tij të vetëmlindur që të vdiste për mëkatet e tua. Cili duhet të jetë reagimi yt, tani që ti e kupton çmimin e madh që Krishti ka paguar për ty?

## Mësimi

### Hyrja

A ju kujtohet historia e Kevinit dhe Xhekut? (*Shfaqni Figurën I-7; për hir të atyre që nuk ishin të pranishëm në javët e mëparshme, lërini fëmijët që të tregojnë shkurtimisht historinë.*) Le të vazhdojmë historinë e dy shokëve tanë.

#### Piktura III-1

Pasi gjyqi kishte përfunduar, Xheku e ftoi vëllain e tij për darkë. Sapo ata arritën në shtëpinë e tij, ata u ulën në dhomën e pritjes dhe Kevinin filloi të flasë. Çfarë mendoni ju se tha ai? Unë do t'ju jap dy sugjerime dhe ju do të gjeni se cili prej tyre është i saktë?

Sugjerimi i parë: "Xhek, ishte mirë që ti e pagove shumë e ndëshkimit, por mos prit që unë të heq dorë nga vjedhja për këtë arsye. Lermë ta jetoj jetën time si të dua dhe ti jetoje jetën tënde ashtu si ti do. Unë do të bëj ç'të dua me jetën time."

Sugjerimi i dytë: "Xhek, unë të jam shumë mirënjohës që ti e pagove atë shumë që meritonte ndëshkimi im. Unë e pranoj se e meritoja, por nuk mund ta paguaja. Faleminderit shumë për këtë. Që tani e tutje unë dua të jetoj në një mënyrë të tillë që nuk do të të turpëroj."

Sugjerimi i dytë është i saktë. Madje Kevin vazhdoi të thoshte: "Xhek, unë as nuk mund të filloj të ta kthej, por ndoshta unë mund të vij nga ty herë pas here dhe të të laj makinën, ose të të pres barin. A do të më lejosh ta bëj këtë? Vetëm për të të treguar sesa shumë e vlerësoj mirësinë tënde, megjithëse nuk mund të t'i kthej kurrë paratë."

#### Piktura III-2

Këtu kemi dy mundësi të përmbledhura në këto Piktura. Cila figurë i korrespondon të krishterit të vërtetë? Mundësia e parë: "Zoti Jezus, të falenderoj që ke marrë ndëshkimin e tmerrshëm për mëkatet e mia. Që tani e tutje unë dua të të kënaq Ty. Më ndihmo në familjen, shkollën time dhe kudo që të ndodhem, që të të tregoj se unë të dua Ty dhe jam mirënjohës ndaj Teje."

Mundësia e dytë: "Zoti Jezus, është shumë mirë që të jesh i krishterë. Më pëlqen mësimi i së dielës, dhe kam shokë të mirë. Por a duhet të bëj me të vërtetë atë çfarë më thonë prindërit e mi? Është e vështirë, sepse unë dua të bëj atë që më pëlqen."

Unë shpresoj që të mos reagoni sipas shembullit të dytë. Le të mendojmë rreth këtyre dy Pikturave. Çfarë mendoni se është duke ndodhur? Cila figurë e tregon qëndrimin e një të krishterit të vërtetë-fëmija që është duke shtruar tryezën, apo fëmija që luan jashtë dhe bën sikur nuk po e dëgjon nënën që po e thërret?

Të jesh i krishterë është diçka e mrekullueshme dhe ngazëlluese, por nuk është gjithnjë e lehtë. Në fakt është një betejë e vërtetë. Ne kemi një armik të tmerrshëm, i quajtur Satan, që do të bëjë

gjithçka që mundet për të na shtyrë që të bëjmë gjëra të këqija dhe të trishtojmë Zotin Jezus, edhe pse jemi fëmijë të Perëndisë. Ne kemi një armik shumë të fuqishëm që lufton kundër nesh, por çdo i krishterë ka një Ndhimues edhe më të fuqishëm që jeton brenda tij (ose saj), për ta ndihmuar atë për të bërë çfarë është e drejtë. A e dini se kush është ai? Le të shohim tek Romakëve 8:9 ku Ai përmendet tre herë (një nga fëmijët le ta lexojë atë): “Nëse Fryma e Perëndisë banon në ty, ti nuk je më në mish, por në Frymë. Por në qoftë se ndokush nuk ka Frymën e Krishtit, ai nuk i përket atij.” Si quhet Ai? Ai ka tre emra këtu-Fryma e Krishtit dhe Fryma e Perëndisë. Ne zakonisht e quajmë Fryma e Shenjtë. Ai është Perëndi dhe jeton në çdo të krishterë, çdo person që i ka besuar Zotit Jezus Krisht si Zotit dhe Shpëtimtarit të tij personal. Nëse ti i ke besuar Atij si Shpëtimtarit tënd, Fryma e Shenjtë jeton në ty për të të dhënë fuqi në luftën tënde kundër djallit! Sot ne do të gjejmë në librin e Romakëve katër gjëra të mahnitshme që Fryma e Shenjtë dëshiron të bëjë, dhe është i aftë të bëjë, në jetën e çdo fëmije të Perëndisë.

### Piktura III - 3

Para së gjithash Ai na ndihmon që të zbatojmë urdhërimet e Perëndisë. Tek Romakëve 8:4 ne lexojmë (një fëmijë më i rritur le ta lexojë): “Që të përmbushet drejtësia e ligjit në ne, që nuk ecim sipas mishit, por sipas Frymës.” Kjo është pak e vështirë për t’u kuptuar, por do të thotë që kur Fryma e Shenjtë është në kontroll të jetëve tona, ne i zbatojmë urdhërimet e Perëndisë. Ashtu si në figurën që ne shikojmë më parë (tregojeni faqen 2 shkurtimisht përsëri). Ai na jep fuqinë për t’u bindur prindërve tanë dhe për të mposhtur tundimet e djallit.

Sandra ishte 10 vjeç. Një vit më parë në Kampin Biblik ajo i kërkoi Zotit Jezus Krisht që të bëhej Zoti dhe Shpëtimtari i saj. Shpesh kur ajo kthehej në shtëpi nga shkolla, nëna e saj i kërkonte asaj të shkonte në dyqan për të blerë ushqime. Para se të bëhej e krishterë, Sandra mbante shpesh disa para për vete, para se t’a vinte mbetjen e parave në çantën e

nënës. Nëna nuk i numëronte asnjëherë paratë dhe nuk e dinte se Sandra ishte duke vjedhur. Por tani Sandra ishte kthyer në besim, dhe donte të kënaqte Zotin Jezus dhe të bënte atë që është e drejtë, megjithëse ndonjëherë ajo ende tundohej për t’iu kthyer zakonit të vjetër të të vjedhurit. Kush ishte ai që ia kujtonte asaj urdhërimin e Perëndisë, “Nuk do të vjedhësh” dhe që i jepte asaj fuqinë për të bërë atë që ishte e drejtë? Po, Fryma e Shenjtë.

Në mbrëmje, pasi bënte detyrat e shtëpisë, Sandra ndonjëherë shkonte në shtëpinë e një shoqeje të saj. Kur nëna e pyeste, se ku ishte duke shkuar, Sandra tundohej të përgjigjej, “Xheni do të më ndihmojë për të bërë detyrat e shtëpisë.” Nëna e saj i thoshte që të shkonte dhe të qëndronte aty sa do t’i duhej. Por një zë nga brenda i kujtonte asaj urdhërin e Perëndisë, “Mos e gënjeni tjetrin” dhe ajo i tha asaj të vërtetën: “A mund të luaj pak me Xhenin?” Nëna e saj nuk e lejonte atë të rrinte më shumë sesa i duhej për të bërë detyrat e shtëpisë, por tani Sandra e dinte se duhet të thoshte të vërtetën. Kush do ta ndihmonte atë? Po, Fryma e Shenjtë. Nëse ti je një djalë ose vajzë e krishterë, ti mund t’i kërkosh Frymës së Shenjtë që të të ndihmojë për t’u bindur urdhërimeve të Perëndisë. Ai do të të japë fuqinë, nëse i beson Atij.

### Piktura III - 4

Ndonjëherë të krishterët dyshojnë nëse ata janë me të vërtetë fëmijë të Perëndisë. Ata pyesin veten, “A jam unë me të vërtetë një fëmijë i Perëndisë? A jeton tani në jetën time Zoti Jezus Krisht? Nëse do të vdisja, a do të shkoja në parajsë?” Djalli do që ne të dyshojmë nëse jemi me të vërtetë fëmijë të Perëndisë. Te kush kthehesh, nëse ke këto lloj dyshime? Nëse Jezus Krishti është Zoti dhe Shpëtimtari yt, ti ke Dikë që ndodhet shumë, shumë afër për të të ndihmuar. Kush është ai? Le të lexojmë Romakëve 8:16 (i kërkoni një fëmijë më të rritur që të lexojë vargun): “Vetë Fryma i dëshmon frymës sonë se ne jemi bij të Perëndisë.” Kjo do të thotë që nëse ti je një fëmijë i Perëndisë, Fryma e Shenjtë të nxit dhe të jep paqe në zemrën tënde, duke të



siguruar që je vërtet një pjesëtar i familjes së Perëndisë. Nuk është një zë që e dëgjon me veshët e tu, por që Ai ta bën të ditur, thellë nga brenda, që i përket Atij. Prandaj bashkë me fuqinë që të jep për të kënaqur Perëndinë, Fryma e Shenjtë të siguron se je një fëmijë i Perëndisë, kur ti i ke besuar Zotit Jezus.

### Piktura III-5

Si të siguron Fryma e Shenjtë se je një fëmijë i Perëndisë? Ai e bën këtë në dy mënyra: me anë të premtimeve të Perëndisë dhe me anë të mënyrës se si Ai ka ndryshuar jetën tuaj. Më lejoni t'ju shpjegoj se si ndodhi me Sandrën. Sandra shkante në Klub çdo të mërkure pasdite. Klubi organizohej në një shtëpi që ndodhej vetëm dy blloqe pallatesh larg nga shtëpia e saj. Ajo kishte shkuar edhe në një Kamp Biblik dhe diçka e mrekullueshme kishte ndodhur atje; ajo ishte lutur për të pranuar Jezus Krishtin si Zotin dhe Shpëtimtarin e saj personal. Megjithatë ndonjëherë djalli sillte dyshime në mendjen e Sandrës dhe ajo pyeste veten nëse ishte e shpëtuar me të vërtetë dhe a do të shkante në parajsë. Ajo mendonte se mësuesja e saj e klubit mund ta ndihmonte atë, prandaj një ditë ajo qëndroi pas mësimi dhe foli për problemin e saj me mësuesen.

“Ndonjëherë unë nuk jam e sigurt nëse Zoti Jezus jeton me të vërtetë në jetën time,” tha ajo. Mësuesja ia shpjegoi asaj në këtë mënyrë: “Sandra, a të kujtohet vjet në kamp, kur i kërkove Zotit Jezus që të ishte Shpëtimtari yt? A të kujtohet vargu që ke lexuar atë ditë në Biblën tënde, “Kushdo që do ta thërrasë emrin e Zotit do të shpëtohet” (Romakëve 10:13)? Kur u lute, a i kërkove Zotit që të falte mëkatet e tua dhe të merrte kontroll të jetës tënde?” “Po,” u përgjigj Sandra, “E kam bërë këtë, i kam kërkuar që të më shpëtojë dhe e kisha seriozisht.” Mësuesja tha, “Ja ku është premtimi i Tij: nëse do të thërrasësh emrin e Tij, Ai do të të shpëtojë. Pra çfarë mendon se ka bërë Ai?” “Ai më ka shpëtuar.” “Dhe si mund të sigurohesh?” e pyeti atë mësuesja. Sandra mendoi në heshtje për një çast. Pastaj mësuesja shpjegoi, “Ti mund të jesh e sigurt për shkak të premtimit të Perëndisë. Dhe ka një premtim tjetër të mrekullueshëm tek

Hebrenjve 13:5 ku Perëndia thotë, ‘Nuk do të të lë’.”

“Ka edhe diçka tjetër,” tha mësuesja, “Gjatë vitit të kaluar ka pasur një ndryshim të vërtetë në sjelljen tënde. Pak nga pak ti je bërë më e dashur dhe më e bindur dhe më e vëmendshme në mësim. Kjo është një shenjë për mua që tregon se ti e ke pranuar Zotin Jezus si Shpëtimtarin tënd.”

Ndërsa Sandra mendonte për premtimin e Zotit dhe ndryshimin në jetën e saj, ajo kishte një gëzim dhe paqe të mrekullueshme në zemrën e saj. Nuk ishte aq shumë inkurajimi i mësueses që i jepte asaj siguri. A e dini se kush po e ndihmonte atë qetësisht për t'u siguruar se ajo ishte një fëmijë e Perëndisë? Po, Fryma e Shenjtë në zemrën e saj. Ai mund ta bëjë këtë edhe për ty. Kur ti ke dyshime, mendo për kohën kur i ke kërkuar Zotit Jezus që të të shpëtojë. Mendo për premtimin e Tij për të të shpëtuar dhe për të qenë me ty. Mendo edhe për ndryshimet e vogla në jetën tënde. Fryma e Shenjtë do të të ndihmojë për të mposhtur dyshimet dhe frikërat e tua. Kjo është pjesë e punës së Tij. Besoji Atij që ta bëjë këtë për ty.

### Piktura III-6

Sandra e kishte të vështirë për të vendosur edhe për gjëra të vogla, si p.sh. se çfarë këpucësh duhet të vishte, ose kë donte të ftonte për ditëlindjen e saj. Ndërsa ajo mendonte për disa prej vendimeve të mëdha që shoqet e saj më të rritura po merrnin, vendime që edhe ajo vetë duhet t'i merrte pas disa vjetësh, ajo pyeste veten se si do të mund t'i merrte ato. Pastaj një ditë mësuesja i mësoi asaj në Klubin e Lajmit të Mirë se Fryma e Shenjtë donte ta ndihmonte atë edhe për këtë gjë.

Fryma e Shenjtë na udhëheq në atë që bëjmë. Kjo është gjëja e tretë që Ai bën. (A mund t'i kujtosh dy të parat?) Ai na tregon çdo ditë se çfarë është e drejtë dhe çfarë është e gabuar; Ai na ndihmon që të njohim dhe të bëjmë vullnetin e Perëndisë për çdo ditë. *(Një nga fëmijët le të lexojë Romakëve 8:14):* “Sepse të gjithë ata që udhëhiqen nga Fryma e Perëndisë janë bij të Perëndisë.” Fryma e Shenjtë do të na udhëheqë në ato rrugë që Perëndia ka

planifikuar për jetët tona. Për shembull pas disa vjetësh, si do ta dish se cilat lëndë duhet të studiosh në shkollë dhe cilat jo? Si do ta dish se cilët shokë duhet të zgjedhësh? Si do ta dish se në çfarë pune duhet të hysh? Ndoshta Perëndia do që të jesh një misionar, predikues ose një ungjilltar. Si do ta zbulosh se cili është vullneti i Perëndisë për jetën tënde? Në të gjitha këto gjëra Fryma e Shenjtë mund të të udhëheqë në marrjen e vendimeve të zgjuara. Unë jam i sigurtë se ju jeni duke pyetur, “Por **si** na udhëheq Fryma e Shenjtë?”

### **Piktura III-7**

*(Mbulojeni këtë figurë me dy shirita letre, dhe pastaj i hiqni ato një nga një gjatë mësimi.)*

Mbi të gjitha Ai na udhëheq nëpërmjet Biblës dhe lutjes. Ndërsa lexoni Fjalën e Perëndisë çdo ditë dhe i kërkonti Atij t’ju udhëheqë, Ai do të të ndihmojë që të dini se ç’është e drejtë dhe çfarë Ai do që ti të bësh. Ndonjëherë Ai do t’ju tregojë një premtim të veçantë ose një urdhërim nga Bibla të cilin Ai do që t’a njihni dhe t’i bindeni. Në Psalmin 119:105 ne lexojmë, “Fjala jote është një llambë në këmbën time dhe një dritë në shtegun tim.”

Ka një rrugë tjetër se si mund ta dimë se çfarë do Perëndia që ne të bëjmë me anë të paqes që Fryma e Shenjtë na e jep në zemrat tona. Kolosianëve 3:15 thotë, “Paqja e Perëndisë të mbretërojë në zemrat tuaja.” Fryma e Shenjtë e ka dhënë paqen e Tij për të qenë një “arbitër” në zemrat tona. Ju e dini se çfarë bën një arbitër, apo jo? Ai i fryn bilbilit kur dikush kryen një gabim. Kur një i krishterë bën diçka që bie ndesh me vullnetin e Perëndisë, paqja e Perëndisë do të trazohet në zemrën e tij. Kur ti bën atë që është vullneti i Perëndisë për ty, do të kesh paqe për këtë, edhe pse mund të jetë shumë e vështirë.

Fryma e Shenjtë përdor të krishterë të tjerë për të na udhëhequr. 1 Pjetër 5:5 thotë që besimtarët më të rinj duhet të dëgjojnë ata që janë më në moshë dhe kanë më shumë përvojë në jetën e krishterë. Mësuesit tuaj në mësimin e së Dielës dhe Klubin e Lajmit të Mirë do t’ju japin këshilla të mira rreth vullnetit të Perëndisë për jetën tuaj. Mos kini frikë që

t’u kërkonti atyre këshilla. Të krishterë të tjerë duan t’ju ndihmojnë që të ecni sipas planit të Perëndisë për jetën tuaj.

### **Piktura III-8**

Deri tani ne kemi menduar për tre gjëra madhore që Fryma e Shenjtë bën tek besimtari. (A ju kujtohen ato?)

Më në fund, ka edhe një vepër tjetër të mrekullueshme që Fryma e Shenjtë bën në jetët e të krishterëve. Le të lexojmë Romakëve 8:26 dhe të shohim se cila është kjo vepër tjetër e mrekullueshme (*një nga fëmijët le të lexojë vargun*): “Kështu, pra, edhe Fryma na ndihmon në dobësitë tona, sepse ne nuk dimë çfarë të kërkojmë në lutjet tona, sikurse duhet; por vetë Fryma ndërhyr për ne me psherëtima të patregueshme.” A e kuptoni se çfarë kemi lexuar? Perëndia na mëson në këtë varg se Fryma e Shenjtë na ndihmon në lutjet tona. Ai i lutet Perëndisë për ne, dhe na ndihmon që të lutemi si duhet. Sepse Ai jeton në ne, Ai mund të na udhëheqë që të lutemi për gjërat e dhura; Ai mund të na ndihmojë që të vijmë tek Perëndia në lutje me respekt dhe përulje të vërtetë: Ai mund të na ndihmojë që t’i besojmë Perëndisë për gjërat që ne i kërkojmë. Është një bekim i madh që Fryma e Shenjtë lutet për ne dhe na ndihmon të lutemi. I kërkonti Atij që t’ju mësojë sesi të luteni edhe më mirë.

Çfarë Miku dhe Ndhimuesi është Fryma e Shenjtë! A i jepni falenderime Perëndisë që Ai jeton në zemrën tuaj? Lëreni Atë që t’i bëjë në jetën tuaj këto gjëra të mrekullueshme për të cilat kemi menduar sot. Mundohuni që të mos ta ofendoni Atë ose ta trishtoni Atë duke bërë gjëra mëkatore.

A u flet Fryma e Shenjtë edhe zemrave të djemve dhe vajzave që nuk u kanë besuar Jezus Krishtit si Zotit dhe Shpëtimtarit të tyre? Çfarë mendoni? Ai e bën këtë! Ai të tregon se je një mëkatar dhe të bën që të vish tek Jezusi. Nëse Ai është duke të folur, dëgjo atë që po të thotë dhe eja sot te Krishti! Ai premtion “Kushdo që do ta thërrasë emrin e Zotit do të shpëtohet” (Romakëve 10:13).

## Konkurs Përsëritës bazuar mbi Mësimin III

1. Çfarë donte të bënte Kevini për t'i treguar mirënjohjen e tij Xhekut? *(Të lante makinën e tij)*
2. Mendoni për tre gjëra që ne mund të bëjmë për t'ia shfaqur mirënjohjen tonë Zotit që na ka shpëtuar. *(T'u bindemi prindërve tanë, të jemi të sinqertë në shkollë, të ndihmojmë shokët tanë.)*
3. Çdo djalë ose vajzë i krishterë ka një armik të fuqishëm por një Mik dhe Ndhimes edhe më të fuqishëm. Kush janë ata? *(Satani është armiku; Fryma e Shenjtë është Miku.)*
4. Kush është Fryma e Shenjtë dhe ku jeton Ai? *(Ai është Perëndi dhe jeton në çdo të krishterë.)*
5. Cilat ishin dy mënyrat me anë të të cilave Sandra e tregonte që Fryma e Shenjtë po e ndihmonte atë për të zbatuar urdhërimet e Perëndisë? *(Duke mos vjedhur nga kuleta e nënës dhe duke thënë të vërtetën kur ajo do të shkonte tek shtëpia e shoqes së saj.)*
6. Kur një djalë ose vajzë i/e krishterë ka dyshime nëse ai është apo jo vërtet një fëmijë i Perëndisë, si ndihmon Fryma për t'i larguar këto dyshime? *(Me anë të premtimeve të Fjalës së Perëndisë dhe mënyrës sesi Ai ka ndryshuar jetën e tij.)*
7. Në çfarë lloj vendimesh dëshiron të na udhëheqë Fryma e Shenjtë? *(Në të gjitha llojet e vendimeve, si të mëdha ashtu edhe të vogla.)*
8. Si na udhëheq Ai? *(Nëpërmjet Biblës dhe lutjes, nëpërmjet paqes së Perëndisë në zemrat tona, dhe së treti nëpërmjet të krishterëve të tjerë.)*
9. Çfarë veprimi tjetër bën Fryma e Shenjtë në jetët e të krishterëve? *(Është ajo që përmendëm të fundit.) (Ai na ndihmon në lutjet tona.)*
10. A vepron Fryma e Shenjtë në zemrat e djemve dhe vajzave të pashpëtuar? Nëse po, si? *(Po, Ai u tregon atyre se ata janë mëkatarë dhe i bën ata të duan të vijnë te Krishti.)*

## Vargje për Mësimin III

- Romakëve 8:4 “Që të përmbushet drejtësia e ligjit në ne, që nuk ecim sipas mishit, por sipas Frymës.”
- Romakëve 8:9 “Nëse Fryma e Perëndisë banon në ju, ju nuk jeni më në mish, por në Frymë. Por në qoftë se ndokush nuk ka Frymën e Krishtit, ai nuk i përket Atij.
- Romakëve 8:14 “Sepse të gjithë ata që udhëhiqen nga Fryma e Perëndisë janë bij të Perëndisë.”
- Romakëve 8:16 Vetë Fryma i dëshmon frymës sonë se ne jemi bij të Perëndisë.
- Romakëve 8:26 “Kështu, pra, edhe Fryma na ndihmon në dobësitë tona, sepse ne nuk dimë çfarë të kërkojmë në lutjet tona, sikurse duhet; por vetë Fryma ndërhyr për ne me psherëtimë të patregueshme.”

# Mësimi IV

## Populli i zgjedhur i Perëndisë

**Pasazhi i Shkrimit:** Romakëve 9-11

**E Vërteta Qendrore:** Populli i zgjedhur i Perëndisë tani përbëhet nga të gjithë ata që besojnë në Zotin Jezus Krisht, qofshin ata Judenj ose johebrenj.

**Zbatimi ndaj të pashpëtuarve:** I kërkoni Zotit Jezus Krisht që t'ju shpëtojë.

**Zbatimi ndaj të shpëtuarve:** Falënderoni Perëndinë që ju ka shpëtuar dhe që bëni pjesë në popullin e Tij të zgjedhur.

**Vargu Përmendësh:** *“Kushdo që do ta thërrasë emrin e Zotit do të shpëtohet”*  
(Romakëve 10;13).

### Skema:

Piktura IV-1:

Hyrja: Shumë Judenj u vranë gjatë Luftës së Dytë Botërore. Judenjtë u zgjodhën nga Perëndia në mëshirën e Tij për të qenë populli i Tij i veçantë. VQSH.

Piktura IV-2: Perëndia i zgjodhi Judenjtë që të shkruanin Biblën.

Piktura IV-3: Perëndia i zgjodhi Judenjtë për të qenë raca prej nga do të vinte Shpëtimtari i botës.

Piktura IV-4: Zoti Jezu Krisht erdhi për të shpëtuar Judenjtë dhe ata që nuk ishin Judenj. VQP.

Judenjtë e mohuan Shpëtimtarin e Perëndisë dhe u përpoqën që të shpëtoheshin me anë të veprave.

Piktura IV-5: Kopshtari i sharton degët e ullinjve të egër në pemë të ullirit që nuk prodhon ullinj të mirë.

Piktura IV-6: Ne që nuk jemi Judenj dhe jemi të shpëtuar jemi “shartuar”-nëpërmjet mëshirës së Perëndisë. VQSH.

Piktura IV-7: Perëndia i “sharton përsëri” Judenjtë që e vënë besimin e tyre në Zotin Jezus Krisht.

Piktura IV-8: Jini mirënjohës ndaj Perëndisë dhe lutuni për Judenjtë që të shpëtohen. VQSH.

### Aktivitete të lidhura:

a. Shihni sugjerimin për lutjen në fund të mësimi.

b. Ju mund t'u flisni nxënësve më shumë rreth shartimit. Ata mund të marrin pjesë në prerjen e një dege në formë “V”-je dhe të vënë biskun e një peme tjetër në degën në formë “V”-je. Nëse është më e lehtë për ju, një prerje e pjerrët mund t'i bëhet degës. Pastaj lidhja duhet të forcohet me një mbulesë me lëvore dhe spango.

Vini re: shartimi është thujse një art dhe bisku juaj i ri mund të mos rritet, por të paktën parimi mund të ilustrohet.

## Mësimi

### Piktura IV-1

Disa prej djemve dhe vajzave më të rritura kanë lexuar histori rreth Luftës së

fundit Botërore, ose ndoshta ju keni parë programe në televizion. Të gjitha luftërat janë të tmerrshme, sepse shumë njerëz trima vriten nga të dyja palët; edhe gra dhe fëmijë vriten, kur aeroplanët hedhin

bomba mbi qytete, Por një nga gjërat më të tmerrshme që ndodhi gjatë Luftës së fundit Botërore ka qenë vrasja e shumë Judenjve të pafajshëm-burra, gra, djem dhe vajza.

Kush janë Judenjtë? Në mësimin e parafundit, unë po ju tregoj rreth Judeut të parë që ka jetuar ndonjëherë; ai quhej Abraham. A ju kujtohet se si Perëndia e thirri atë për ta lënë qytetin e tij Uz dhe vendin e tij e t'i besonte Perëndisë për t'i dhënë një vend të ri dhe një familje të madhe? Abrahami kishte një bir të quajtur Isak dhe një nip të quajtur Jakob. Jakobi kishte 12 bij, dhe kështu numri i Judenjve filloi të rritej gjithnjë e më shumë. Tani ka miliona Judenj që jetojnë në shumë vende, dhe veçanërisht në vendin e Izraelit.

Pse i zgjodhi Perëndia Judenjtë si popullin e Tij të veçantë? Ai nuk i zgjodhi ata sepse ishin më të shumtët në numër: kur Perëndia zgjodhi Judenjtë ishte vetëm njëri prej tyre-Abrahami. Ai nuk i zgjodhi ata sepse ishin më të mirët në gjithë botën, ose sepse ishin më të fortët: Ai i zgjodhi ata për shkak të mëshirës së Tij. Për këtë arsye thuhet tek Romakëve 9:15 (*një fëmijë të lexojë vargun*): “Do të kem mëshirë për atë që të kem mëshirë, dhe do të kem dhembshuri për atë që do të kem dhembshuri.” Perëndia tregon mëshirë për ata që Ai zgjedh dhe është i dashur me ata që nuk e meritojnë. Judenjtë nuk e meritonin për t'u zgjedhur nga Perëndia. Abrahami, Isaku, Jakobi dhe të gjithë fëmijët e tij ishin mëkatarë, si ti dhe unë.

### **Piktura IV-2**

Por Perëndia kishte një detyrë të veçantë për Judenjtë. Tek Romakëve 3:2 ne lexojmë se atyre u ishin besuar vetë Fjalët e Perëndisë. Kjo do të thotë se ata kishin përgjegjësinë e madhe për të shkruar me përpikmëri Fjalët e Perëndisë. Kështu në mënyra të ndryshme Perëndia u foli disa Judenjve dhe ata shkruan çfarë Ai tha. Në këtë mënyrë ne e kemi fituar Biblën tonë libër pas libri. Moisiu ishte një Jude që dëgjoi çfarë tha Perëndia dhe shkroi pesë librat e parë të Biblës. Mbreti David ishte një Jude që dëgjoi Perëndinë dhe shkroi shumë prej Psalmeve. Profeti Daniel ishte një Jude. Mateu, që shkroi

Ungjillin e parë, ishte një Jude. Pali ishte një Jude. Sa shumë duhet ta falënderojmë Perëndinë për punën që shkruesit Judenj kanë bërë me ndihmën e veçantë të Perëndisë. Ata e lanë Perëndinë t'i udhëhiqte ata në atë që shkruan në mënyrë që ne të kemi në këtë libër të çmuar, Biblën, pikërisht atë që Perëndia donte të na thoshte.

### **Piktura IV-3**

Por Perëndia kishte një arsye tjetër që zgjodhi Judenjtë (ata ndonjëherë quhen “Hebrenj”). Ai e zgjodhi këtë popull në mënyrë që nëpërmjet tyre të vinte Shpëtimtari i botës. (*I kërkon një fëmijë të lexojë Romakëve 9:5*): “Të tyre janë edhe etërit, prej të cilëve rrjedh sipas mishit Krishti, i cili është përmbi çdo gjë Perëndi, i bekuar përjetë.” Mijëra vjet para se Zoti Jezus të kishte lindur, Perëndia premtoi se një ditë Ai do të dërgonte një Shpëtimtar. Edhe para se Abrahami, Moisiu të jetonin, Perëndia e kishte bërë premtimin. Shumë vite kaluan. Ndoshta njerëzit mendonin që Shpëtimtari nuk do të vinte kurrë. Armiq të fuqishëm i sulmonin Judenjtë dhe disa herë dukej se ata mund të shfaroseshin fare. Por Perëndia i mbrojti ata, sepse e kishte zgjedhur këtë popull për të qenë ai prej të cilit do të vinte Shpëtimtari. Më në fund Jezusi lindi në Betlehem dhe u vu në grazhd. A e dini se Jezusi lindi në një familje Judenjsh? Maria, nëna e Zotit Jezus Krisht, ishte një Jude. Jozefi, të cilit iu dha detyra për të rritur Jezus Krishtin, ishte një Jude. Në fakt vetë Jezusi ishte një Jude, megjithëse natyrisht që Ai në të njëjtën kohë ishte edhe Biri i Perëndisë njëkohësisht.

### **Piktura IV-4**

Zoti Jezus nuk lindi vetëm për të qenë Shpëtimtari i Judenjve, por i të gjithë njerëzve. Ai erdhi për të shpëtuar njerëz nga çdo vend i botës. Por fatkeqësisht Judenjtë nuk e kuptuan ose nuk e pranuan planin e mrekullueshëm të Perëndisë për shpëtimin. Ti e di se cili ishte ai plan, apo jo? Le të lexojmë rreth tij tek Romakëve 10:12, 13 (*kërkoji një fëmijë të lexojë*): “Sepse nuk ka dallim në mes Judeut dhe Grekut, sepse një i vetëm është Perëndia i

të gjithëve, i pasur ndaj të gjithë atyre që e thërrasin. Në fakt: Kushdo që do ta thërrasë emrin e Zotit do të shpëtohet.” Ne jemi të shpëtuar kur ne i thërrasim emrit të Zotit për të na shpëtuar nga mëkatet tona. Ne nuk mund ta shpëtojmë veten, por ne i besojmë Atij dhe i kërkojmë Atij që të jetë Zoti dhe Shpëtimtari ynë. Vetëm Ai mund t'i largojë mëkatet tona dhe të na bëjë fëmijë të Perëndisë.

A i ke thërritur emrit të Zotit; a i ke kërkuar Zotit që të të shpëtojë nga mëkatet e tua? Ti mund ta bësh këtë sot. Perëndia premton, “Kushdo që do ta thërrasë emrin e Zotit do të shpëtohet? I thërritni Atij sot.

Nëse ju e keni bërë këtë dhe nuk i keni thënë askujt ose nëse do të donit ta bëni këtë dhe nuk e dini se çfarë duhet të bëni, ju lutemi qëndroni pas mësimit aty ku jeni. Nëse ju shoh të ulur atje unë do të vij dhe do të flas me ju se çfarë do të thotë t'i thërrasësh Zotit.

Por Judenjëtë nuk e pranuan këtë rrugë të mrekullueshme shpëtimi. Ne lexojmë tek Romakëve 9:32 (*kërkoji një fëmijë të lexojë*); “Sepse e kërkonte (shpëtimin) jo me anë të besimit, por me anë të veprave të ligjit.” Ata mendonin se duhet të punonin për të shkuar në parajsë-se në qoftë se ata i zbatonin të gjitha urdhërimet Perëndia do t'i pranonte ata. Natyrisht që askush nuk mund t'i zbatonte urdhërimet e Perëndisë përsosmërisht dhe prandaj ata nuk mund të shpëtoheshin në këtë mënyrë. Judenjëtë e mohuan Zotin Jezus: ju e mbani mend sesi ata e çuan Atë në kryq që të vdiste. Perëndia u trishtua shumë duke parë sesi e mohuan ata Birin e Tij. Por nëse Judenjëtë nuk e pranuan Zotin Jezus, Perëndia kishte zgjedhur një popull që do të besonte në Të dhe do ta donte Atë. Kush ishin ata vallë.

#### **Piktura IV-5**

Tek Romakëve Pali e krahason Perëndinë me një kopshtar, që kujdeset për frutat e pemëve të tij. Kopshtari ka një pemë ulliri të bukur që duhet të rrisë shumë ullinj të zi të shijshëm. Romakët i përdornin ullinjtë për sallatë dhe, kur ato shtypeshin, ullinjtë nxirrnin vaj ulliri që përdorej për gatim dhe për pjekje. Prandaj një pemë ulliri ishte me të vërtetë një pemë shumë e dobishme.

Kjo figurë e pemës së ullirit na kujton për popullin e veçantë të Perëndisë Judenjëtë. Ata ishin shumë të çmuar për Perëndinë, ashtu si pema e ullirit ishte për kopshtarin. Por pema e ullirit nuk po prodhonte ullinjtë e mirë që kopshtari i priste-ashtu si Judenjëtë që nuk po i besonin si duhet Zotit Jezu Krisht. Prandaj bujku pret shumë degë. Po kështu Perëndia po i linte mënjanë Judenjëtë si popull. Por pastaj kopshtari bëri diçka të çuditshme. Ai shkoi në pyll dhe gjeti një pemë të egër ulliri. Ai preu disa prej degëve të kësaj peme të egër ulliri dhe i vuri ato në ato vende të pemës ku kishin qenë degët e vjetra të ullirit. Ai e lidhi bashkimin me lëvore dhe spango, dhe shpejt degët e reja të ullirit filluan të rriteshin, duke e marrë ushqimin e tyre përmes trungut dhe bisqeve të pemës së vjetër të ullirit. I gjithë ky proces quhej “shartim”.

#### **Piktura IV-6**

Çfarë dëshiron të na thotë Perëndia nëpërmjet këtij ilustrimi?

Kur ai i flaku mënjanë Judenjëtë si popull, si degët që u prenë dhe u hodhën, Ai kishte një popull tjetër, të cilin e kishte zgjedhur për ta vënë në vend të tyre. Perëndia i zgjodhi edhe ata me anë të mëshirës së Tij; edhe ata nuk meritonin që të zgjidheshin si populli i Perëndisë. Por Perëndia i donte ata dhe i quante populli i Tij.

Kush janë këta burra dhe gra, djem dhe vajza, të cilët Perëndia i ka zgjedhur për të qenë populli i Tij i veçantë tani? (*Një fëmijë le të lexojë Romakëve 11:19*): “Do të thuash, pra: Degët u prenë që të shartohem unë.” Ky popull i veçantë jemi të gjithë ne që i besojmë Jezus Krishtit si Zotit dhe Shpëtimtarit tonë. Ti dhe unë jemi si degët e pemës së egër të ullirit, që janë “shartuar” tek trugu, për të qenë pjesë e pemës së Tij të veçantë. Nuk ka rëndësi nëse ti je francez ose anglez, irlandez apo amerikan: nëse ti i beson Zotit Jezu Krisht, ti je pjesë e popullit të veçantë të Perëndisë.

A mund të mburresh se Perëndia të zgjodhi për të qenë një fëmijë i Tij (nëse je

si një degë e pemës së Tij të veçantë)? (Një fëmijë të lexojë Romakëve 11:18): “Mos u mburr kundër degëve .” Natyrisht që jo! Ne duhet ta kuptojmë që ne nuk e meritonim për t’u zgjedhur prej Tij. Ne nuk e meritonim që Zoti Jezus të vdiste për ne dhe të dëgjonim Ungjillin. Është vetëm nga mëshira e Perëndisë që ne jemi bërë të aftë për të besuar në Zotin Jezus Krisht dhe kemi qenë shpëtuar, dhe në këtë mënyrë ne jemi bërë pjesë e popullit të veçantë të Perëndisë.

#### Piktura IV-7

A do të thotë kjo që Perëndia nuk ka kohë tani për Judenjët? Sigurisht që jo. Perëndia i do akoma ata dhe do që ta njohin Atë, duke vënë besimin e tyre tek Zoti Jezus Krisht. Le të lexojmë Romakëve 11:23, 24 (një fëmijë le t’i lexojë këto vargje): “Kështu edhe ata, nëse nuk do të qëndrojnë në mosbesim, do të shartohen; sepse Perëndia është i fuqishëm t’i shartojë përsëri. Sepse, në qoftë se ti u këpute nga ulliri i egër prej natyre dhe u shartove kundër natyrës në ulli të butë, aq më tepër këto, që janë degë prej natyre, do të shartohen në ullirin e vet?” A mund t’i kuptoni këto vargje? Cilat janë këto “degë” që Perëndia mund t’i shartojë përsëri në pemë? Ata janë Judenj, kur e vënë besimin e tyre në Zotin Jezus Krisht. Sot ka misionarë që punojnë në mes të Judenjve në gjithë botën duke u sjellë atyre Ungjillin. Është një punë shumë e vështirë, sepse shumë Judenj nuk do ta pranojnë Ungjillin dhe nuk do të besojnë se Zoti Jezus ishte Biri i Perëndisë, i dërguar nga qielli për të qenë Shpëtimtari i Judenjve dhe i tërë njerëzimit.

Megjithatë, disa Judenj, kur e dëgjojnë Ungjillin, besojnë në Jezus Krishtin. Ata janë si degë ulliri të shartuara përsëri në pemë. Ata janë pjesë e popullit të zgjedhur të Perëndisë, që përbëhet prej Judenjve dhe atyre që nuk janë Judenj. Ne besojmë që një ditë, para se Zoti Jezus të kthehet si Mbreti i lavdisë, shumë Judenj do të besojnë në Të. A nuk është kjo e mrekullueshme?

#### Piktura IV-8

Çfarë do Perëndia që ne të bëjmë për Judenjët? Ne duhet ta falënderojmë Perëndinë që i ka përdorur ata në mënyrë që ne të kemi Biblën, dhe që i ka bërë raca prej së cilës Zoti Jezus Krisht lindi në botë. Ne nuk duhet t’i përbuzim kurrë ata, por t’i çmojmë dhe t’i duam ata për hir të Krishtit.

Ka edhe një gjë tjetër shumë të rëndësishme që ne duhet të bëjmë. Le të lexojmë Romakëve 10:1 dhe të shohim se çfarë bëri apostulli Pal, dhe çfarë Perëndia do që ne të bëjmë (dikush të lexojë vargun): “Vëllezër, dëshira e zemrës sime dhe lutja që i drejtoj Perëndisë për Izraelin, është për shpëtim të tij.” Ne duhet të lutemi për ta me gjithë zemër, që ata të shpëtohen.

Ndërsa kemi ardhur tek fundi i mësimit tonë sot, unë do t’ju kërkoj 4 personave prej jush që e doni Zotin për t’u lutur:

1. Falënderoni Perëndinë për Judenjët, që nëpërmjet tyre ne morëm Biblën dhe nëpërmjet racës së tyre Zoti Jezus Krisht lindi në tokë.
2. Falënderoni Perëndinë ne të cilët jemi të shpëtuar, jemi zgjedhur për të qenë pjesë e popullit të veçantë të Perëndisë (si degë të shartuara në pemën e ullirit).
3. Lutuni për Judenjët që edhe më shumë prej tyre mund të besojnë në Zotin Jezus Krisht si Shpëtimtarin e tyre dhe të shpëtohen.
4. Lutuni për misionarët që punojnë në mes të Judenjve, që Perëndia t’i ndihmojë ata për të vazhduar që t’u sjellin Ungjillin atyre, edhe kur shumë pak veta duan të dëgjojnë.

#### Konkurs Përsëritës bazuar mbi Mësimin IV

1. Cili ishte Judeu i parë? (Abrahami)
2. Cilët ishin emrat e djalit dhe nipit të tij nëpërmjet të cilëve do të fillonte kombi Jude? (Isaku dhe Jakobi)

3. Në mëshirën e Tij, Perëndia i zgjodhi Judenjtë që të ishin populli i Tij i veçantë. Çfarë do të thotë “mëshirë”? (*Keqardhje ose mirësi ndaj atyre që nuk e meritojnë atë.*)
4. Perëndia kishte dy detyra shumë të veçanta për Judenjtë, popullin e Tij. Cila ishte njëra prej tyre? (*Të shkruanin Biblën.*)
5. Cila ishte tjetra? (*Të ishin populli prej nga do të vinte Shpëtimtari.*)
6. Cila ishte rruga e mrekullueshme e shpëtimit së cilës shumë Judenj i kthyen shpinën? (*Të shpëtohesh me anë të besimit, jo veprave-duke besuar në Jezusin.*)
7. Kur Judenjtë u larguan nga Perëndia dhe nga Zoti Jezus, Perëndia zgjodhi një tjetër popull të veçantë. Cilët ishin ata? (*Të gjithë ne që i besojmë Jezu Krishtit si Zotit dhe Shpëtimtarit tonë.*)
8. Në ilustrimin e pemës së ullirit, kë simbolizojnë degët e prera? (*Judenjtë që nuk besonin në Jezus Krishtin.*)
9. Më pas, degët e një ulliri të egër shartoreshin në të. Kë simbolizojnë ato? (*Ato na simbolizojnë ne që nuk jemi Judenj por besojmë në Jezus Krishtin.*)
10. Pse nuk duhet të mburremi që Perëndia na ka zgjedhur si popullin e Tij të veçantë? (*Ne nuk meritonim që Perëndia të na zgjidhte, që Jezusi të vdiste për ne, që dikush të na sillte Ungjillin, që Perëndia të na jepte besim.*)
- 11 a. A ka hequr dorë Perëndia nga Judenjtë? (*Jo*)  
b. Çfarë do Ai që ata të bëjnë? (*Të besojnë në Jezu Krishtin*)
12. Cila është gjëja më e rëndësishme që ne mund të bëjmë për Judenjtë? (*Lutuni për ta.*)

### Vargje për Mësimin IV

Romakëve 9:5 “Të tyre janë edhe etërit, prej të cilëve rrjedh sipas mishit

Krishti, i cili është përmbi çdo gjë Perëndi, i bekuar për-jetë. Amen.”

Romakëve 9:15 “Do të kem mëshirë për atë që të kem mëshirë, dhe do të kem dhembshuri për atë që do të kem dhembshuri.”

Romakëve 9:32 “Përse? Sepse e kërkonte jo me anë të besimit, por me anë të veprave të ligjit; sepse ata u penguan në gurin e pengesës.

Romakëve 10:1 “Vëllezër, dëshira e zemrës sime dhe lutja që i drejtoj Perëndisë për Izraelin është për shpëtim të tij.”

Romakëve 10:12,13 “Sepse nuk ka dallim në mes Judeut dhe Grekut, sepse një i vetëm është Perëndia i të gjithëve, i pasur ndaj të gjithë atyre që e thërrasin. Në fakt: Kushdo që do ta thërrasë emrin e Zotit do të shpëtohet.”

Romakëve 11:18 “Mos u mburr kundër degëve.”

Romakëve 11:19 “Do të thuash, pra: Degët u prenë që të shartohem unë.”

Romakëve 11:23,24 “Kështu edhe ata, nëse nuk do të qëndrojnë në mos-besim, do të shartohen; sepse Perëndia është i fuqishëm t'i shartojë përsëri. Sepse, në qoftë se ti u këpute nga ulliri i egër prej natyre dhe u shartove kundër natyrës në ulli të butë, aq më tepër këto, që janë degë prej natyre, do të shartohen në ullirin e vet?”



# Mësimi V

## Trupi i Krishtit

**Pasazhi i Shkrimit:** Romakëve 12:1-13

**Pasazhe shtesë:** Kolosianëve 1:18,19; Efesianëve 4:7-16; 1 Korintasve 12:1-31

**E Vërteta Qendrore:** Çdo i krishterë, si një pjesë e trupit të Krishtit, ka disa dhunti për t'i shërbyer Perëndisë dhe të tjerëve.

**Zbatimi për të shpëtuarit:** Falënderoni Perëndinë për dhuntitë që ju ka dhënë. Jepjani veten plotësisht Atij që të përdoreni për të bërë vullnetin e Tij. I kërkoni Atij se çfarë do që ju të bëni.

**Vargu Përmendësh:** *“Ne, megjithëse jemi shumë, jemi një trup në Krishtin” (Romakëve 12:5).*

### Skema:

Hyrja: Të mbash trupin të shëndetshëm.

Piktura V-1: Atleti-trupat tanë janë projektuar mrekullisht nga Perëndia. Çdo besimtar është pjesë e trupit të Krishtit, kishës (Romakëve 12:4,5) VQ

Piktura V-2: Kreu i trupit drejton, kontrollon dhe jep urdhra. Kreu i trupit të kishës është Krishti (Kolosianëve 1:18).

Ai udhëheq, drejton dhe u jep urdhra besimtarëve, kryesisht nëpërmjet Fjalës së Tij.

Piktura V-3: Çdo pjesë e trupit ka një aftësi dhe përgjegjësi të veçantë.

Perëndia ju ka dhënë disa aftësi të veçanta dhe disa detyra të veçanta për të bërë. VQ.

Piktura V-4: Dhuntia e “mësimdhënies”

(Romakëve 12:7).

Dhuntia e “ungjillizimit”

(Efesianëve 4:11). VQSH.

Piktura V-5: Dhuntia e “shërbimit”(Romakëve 12:7).Dhuntia e “kryesimit” (Romakëve 12:8).Dhuntia e “ndarjes” [të dhënit] (Romakëve 12:8).

Piktura V-6: Shembulli i zotit Le Torneau me dhuntinë e të dhënit.

Piktura V-7: Edhe fëmijët e krishterë kanë dhunti-zoti Ori flet me Filipin, Betin dhe Markun. Dhuntia e “nxitjes” ose inkurajimit (Romakëve 12:8).Dhuntia e “veprave të mëshirës” (Romakëve 12:8). Dhuntia e “besimit” (1 Korintasve 12:9).

Piktura V-8: Perëndia do që ne ta paraqesim veten tonë si fli të gjallë ndaj Tij (Romakëve 12:1) VQSH Perëndia nuk dëshiron që ne të jemi krenarë (Romakëve 12:3) I kërkoni Perëndisë se çfarë Ai do që ju të bëni. VQSH.

### Aktivitete të Lidhura:

**Lojë:** (Përdoreni në një pjesë të hershme të programit, si një prezantim qetësues të mësimi.) Pritni prej letre ose kartoni pjesët bazë për 2 “trupa”-një kokë, 2 sy, 2 veshë, një gojë, 2 krahë dhe 2 këmbë. Klasa ndahet në 2 skuadra të barabarta dhe çdo pjesëtar i skuadrës i jepet merr nga një pjesë e trupit. Secilit i mbyllet sytë me radhë dhe shkon në tabelë për të vënë një pjesë të trupit, duke e mbërthyer me kapëse. Skuadra që bën trupin më të mirë fiton. Askush nuk duhet të flasë për të drejtuar personin që vë një pjesë të trupit. Gjithashtu ai fëmijë nuk mund të ndjejë me duart e tij

**Koha e Lutjes** (pas mësimi): Zgjidhni 3 fëmijë të krishterë që të marrin subjektet e mëposhtme dhe të drejtojnë grupin në lutje:

- falënderoni Perëndinë që secili prej nesh është i rëndësishëm në trupin e Krishtit;
- falënderoni Perëndinë që çdo i krishterë ka ndonjë detyrë të veçantë për të bërë dhe aftësi të dhëna nga Perëndia për ta bërë atë;

- i kërkoni Perëndisë t'ju ndihmojë që të dalloni pak nga pak se cila është kjo detyrë dhe cilat janë dhuntitë tona, që ne të përdoremi për Të dhe për të tjerët.

### **Pyetje Përsëritëse**

(Pyetjet janë dhënë në fund të mësimit.)

Ndajeni klasën në dy skuadra me një kapiten për secilën. Kapitenët marrin një copë letre bosh dhe secili nga një tush. Thuaju atyre se duhet të vizatojnë fytyrën tuaj (mund të jetë zbavitëse). Sa herë që një fëmijë i përgjigjet si duhet një pyetje për skuadrën e tij, kapiteni mund të vërë një pjesë në fytyrë-zemrën, sytë, hundën, gojën, veshët. Skuadra e parë që plotëson fytyrën është ajo fituese.

## **Mësimi**

### **Hyrja**

Unë nuk e di se në çfarë sportesh marrin pjesë djemtë dhe vajzat. Sa prej jush luajnë futboll? Basketboll? Tenis? Bëjnë not? Shumë mirë! Pse është e rëndësishme që të marrësh pjesë në sporte? Po, ka disa arsye. Njëra prej tyre është që t'i mbajmë trupat tanë të shëndetshëm dhe në formë.

### **Piktura V-1**

A keni ndjekur ndonjëherë një atlet të famshëm? Ju e shihni atë duke vrapiuar për të arritur vijën e finishit; të gjitha gjymtyrët punojnë përsosmërisht-bërrylat, gjunjët, kyçet dhe qafa; të gjithë muskujt bëjnë punën e lëvizjes së gjymtyrëve-krahëve dhe këmbëve. Trupat tanë janë projektuar mrekullisht nga Perëndia: truri drejton tërë trupin; zemra pompon gjakun nëpërmjet arterieve dhe dejeve; çdo pjesë e vetme e trupit tonë është e dobishme dhe e nevojshme.

Mundohuni që t'i kuptoni këto dy vargje nga Romakëve 12 (kërkojuani një prej fëmijëve që të lexojë Romakëve 12:4,5): "Sepse, sikurse në një trup kemi shumë gjymtyrë dhe të gjitha gjymtyrët nuk kanë të njëjtin funksion, kështu edhe ne, megjithëse jemi shumë, jemi një trup në Krishtin dhe secili gjymtyrë të njeri tjetrit." Çfarë do të thotë kjo? Perëndia na tregon këtu që të gjithë ata të cilët e duan Zotin Jezus shkojnë së bashku si një trup i përsosur. Nuk është një trup që ne mund ta shohim, por një trup i madh i padukshëm i përbërë prej të gjithë të krishterëve të vërtetë. Ky trup quhet Kishë.

Nuk e kam fjalën për ndërtesën me tulla dhe gurë ku ju shkoni të dielave. Kisha për të cilën flet Bibla përbëhet prej njerëzve dhe jo prej gurëve. Çdo besimtar në Jezus Krishtin, çdo i krishterë i vërtetë, është pjesë e këtij trupi të mrekullueshëm. Ndoshta ti je një gisht për të treguar rrugën, ose një gjuhë për të folur, ose një këmbë për të vrapiuar.

### **Piktura V-2**

Koka është pjesa më e rëndësishme e trupit, aty ku ndodhet truri. Për shembull, kur ne shkojmë për një shëtitje, truri jep urdhrat: u thotë muskujve të shpinës dhe këmbëve tona për ta bërë trupin që të ngrihet; i thotë zemrës që të pompojë më fort, meqë na duhen më shumë energji; u thotë mushkërive që të marrin frymë më thellë dhe të thithin më shumë oksigjen; u thotë syve që të na udhëheqin aty ku duhet të shkojmë.

Kush mendon ti se është kreu i Kishës? Pali na tregon në një libër tjetër që Perëndia e udhëhoqi atë për të shkruar (*lexoni Kolosianëve 1:18*): "Ai vetë është kreu i trupit, pra i kishës." Për kë mendon se po shkruan Pali? Po, Zoti Jezus.

Ai është Kreu i trupit, Kishës; Ai kontrollon, udhëheq dhe jep urdhrat. Çfarë ngatërrese e tmerrshme do të ndodhte në trupat tanë, nëse nuk do të kishte tru për të planifikuar dhe drejtuar; ndoshta këmbët do të vendosnin që ishin të lodhura dhe donin të uleshin, por këmbët do të donin të shkonin për një shëtitje; ose sytë do të donin që të mbylleshin për të bërë një pushim të shkurtër, ndërsa duart do të donin të luanin basketboll!

Për këtë arsye është shumë e rëndësishme që çdo besimtar, si pjesë e trupit të madh të Kishës, i bindet Zotit Jezus. Ndërsa ne dëgjojmë Biblën që

mësohet në kishë, në mësimin e së Dielës dhe Klubin e Lajmit të Mirë, ose ndërsa lexojmë vetë Fjalën e Tij në Bibël, Kreu i Trupit na flet, ashtu si drejton truri ynë pjesët e trupit fizik. Si një pjesëtar i trupit të Krishtit, është e rëndësishme që t'i bindesh Zotit tonë Jezus Krisht dhe të vendosësh në praktikë çfarë Ai thotë.

Nëse nuk i ke besuar kurrë Zotit Jezus si Shpëtimtarit tënd, ti nuk i përket Atij. Ti nuk je pjesë e Trupit të Tij. Ti je akoma jashtë Krishtit. Në fakt ti je larg prej Tij. Ti je i humbur në mëkatet e tua. Por Ai po të kërkon. Ai të do aq shumë sa që vdiq për mëkatet e tua. Sot nëse beson në Të me gjithë zemrën tënde dhe vjen tek Ai, Ai do të pranojë. Tek Gjoni 6:37 Ai thotë, "Atë që vjen tek unë, unë nuk do ta nxjerr jashtë kurrë." Eja te Krishti sot!

### Piktura V-3

Nëse Krishti është Kreu i këtij trupi të madh dhe çdo person i rilindur është një pjesëtar i atij Trupi, atëherë është e rëndësishme për ne që të punojmë së bashku për Zotin tonë. Çdo njeri nevojitet, sepse ne kemi të gjithë punë të ndryshme për të bërë (*lexoni përsëri Romakëve 12:5*): "Kështu edhe ne, megjithëse jemi shumë, jemi një trup në Krishtin dhe secili jemi gjymtyrë të njeri tjetrit." Ne të gjithë kemi aftësi, ose dhunti të veçanta, që na i ka dhënë Perëndia, ashtu si pjesët e trupit. Le të mendojmë përsëri rreth asaj se çfarë bëjnë pjesët e trupave tanë. Për shembull, cila është aftësia e veçantë që Perëndia i ka dhënë syrit, që veshi nuk e ka? Po, mund të shohë. Çfarë mund të bëjë veshi që dora nuk e bën? Po, mund të dëgjojë. Çfarë mund të bëjë hunda që nuk mund të bëjë syri? Mund të nuhatë. Çfarë mund të bëjë dora që veshi nuk mund ta bëjë? Mund të mbajë dhe të kapë gjëra. Ju e shihni që, çdo pjesë e vetme e trupit është e rëndësishme. Ne nuk mund të bëjmë pa asnjërën prej tyre. Madje edhe ato brenda nesh, që nuk mund t'i shohim, si mëlçia dhe mushkëritë, janë shumë të rëndësishme.

A e dini që si një i krishterë, ti je shumë i çmuar për Perëndinë? Dhe të gjithë ne të krishterët e tjerë në Trup kemi nevojë për ty. Ne nuk mund të bëjmë pa ty, sepse Perëndia të ka dhënë disa aftësi

të veçanta dhe ndonjë detyrë të veçantë për të bërë. Çfarë lloj detyre? Perëndia i tha Palit që të shkruante se për çfarë lloj punësh e kishte fjalën; ne i gjejmë ato tek Romakëve 12. (*Një nga fëmijët të lexojë Romakëve 12:6-8*). Ne nuk kemi kohë të mendojmë për të gjitha këto gjëra, por le të shohim disa prej tyre:

### Piktura V-4

Për shembull, ai përmend **ata që japin mësim**. A e dini që Perëndia i ka dhënë disa të krishterëve një aftësi të veçantë për të mësuar Biblën? Të gjithë besimtarët mund të ndajnë me të tjerët çfarë thotë Bibla; por për Kishën, Trupin e Krishtit, që të rritet si duhet, Perëndia e dinte se do të nevojiteshin njerëz me dhuntinë e mësimit. Ka pastorë, mësues të mësimit të së Dielës, mësues të Klubit të Lajmit të Mirë, etj. që nëpërmjet dhuntisë së Perëndisë mund të kuptojnë mirë Fjalën e Perëndisë; pastaj ata ia paraqesin atë besimtarëve të tjerë në një mënyrë të tillë që i ndihmon të rriten gjithnjë e më shumë në jetën e krishterë. Sa i mirë është Perëndia që kujdeset për ne në këtë mënyrë. A e ke falënderuar Atë që ka dërguar njerëz me dhuntinë e mësimit për të të ndihmuar?

Diku gjetkë Pali ka shkruar rreth atyre që **kanë dhuntinë e ungjillëzimit** (Efesianëve 4:11). Të gjithë të krishterët duhet t'ia përcjellin Lajmin e Mirë të Jezus Krishtit të tjerëve që nuk janë ende të shpëtuar. Por disa besimtarë janë të pajisur me dhunti të veçanta nga Perëndia për të paraqitur Lajmin e Mirë, që njerëzit të vijnë te Krishti. Bibla flet për shembull rreth Filipit, ungjilltarit (Veprat 28:8). Perëndia e përdori Atë në Samari për të sjellë shumë veta te Krishti dhe në shkretëtirë për të udhëhequr etiopasin tek Shpëtimtari (*Shihni Veprat 8*). A nuk je i gëzuar që Perëndia i ka dhënë Kishës së Tij njerëz të tillë me këtë dhunti të veçantë?

### Piktura V-5

Pali përmend gjithashtu ata që **shërbejnë** (Romakëve 12:7). Të krishterët duhet të ndihmojnë të tjerët-të varfrit, të sëmurët, vejushat dhe jetimët. Ata që kanë

dhuntinë e shërbimit janë veçanërisht të dashur dhe përkujdesës. Ata sigurohen që Kisha të kujdeset për nevojtarët. Bibla flet, për shembull, për një burrë të quajtur Stefan, që e kishte dhënë veten për t'u shërbyer të krishterëve të tjerë (1 Korintasve 15:15-18). Pali ka shkruar rreth ndihmës së madhe që ky person i ka dhënë atij. Kjo është një dhunti e rëndësishme dhe ndoshta një prej jush e ka marrë atë nga Perëndia. Ndoshta ju po e përdorni atë për takimin tonë, duke ndihmuar që të rregullohen karriget, duke u siguruar që flanelobordi të jetë në vendin e duhur dhe librat e këngëve të shpërndahen në karrige. Kjo është fantastike. Vazhdoni ta bëni këtë. Ndoshta për gjithë jetën tuaj ju do të jeni një ndihmues i vërtetë për ata që punojnë për Zotin.

Por ka edhe një nevojë për ata që **drejtojnë në shërbesë**, që kanë një rol të posaçëm në organizimin e aktiviteteve të Kishës. Ne lexojmë rreth kësaj dhuntie tek Romakëve 12:8. A nuk është e mrekullueshme sesi Perëndia siguron për çdo nevojë në Kishën e Tij?

Edhe tek Romakëve 12:8, Perëndia përmend ata që **japin**. Çdo i krishterë duhet t'i japë Zotit, por disa duken se duan veçanërisht të japin, dhe kjo është aftësia e veçantë që Perëndia u ka dhënë atyre.

### Piktura V-6

Zoti Le Tourneau ka qenë një burrë që jetonte në Amerikë. Ai ndërtonte buldozerë të mëdhenj dhe makineri për të ndërtuar rrugë. A keni parë ndonjëherë disa prej këtyre përbindshave të mëdhenj në rrugë? Në fakt zoti Torne e donte Perëndinë dhe kur ai shiti një makineri ai i dha një pjesë të parave Perëndisë. Zoti e bekoj atë dhe ai filloi të shiste gjithnjë e më shumë makineri. Kështu ai u bë shumë i pasur, por në të njëjtën kohë ai jepte gjithnjë e më shumë për shërbesën e Perëndisë, për misionarët dhe predikuesit në vendin e tij si dhe në vende të tjera. Pas një farë kohe ai gati ia jepte të gjithë paratë e tij Perëndisë. Unë besoj se Perëndia i kishte dhënë atij një aftësi të veçantë për të nxjerrë para dhe gjithashtu gatishmërinë në zemrën e tij për t'ia dhënë ato

Perëndisë. Natyrisht që Perëndia do që ne të gjithë të japim ndaj shërbesës së Tij, por ne nuk mund të japim aq shumë sa jepte zoti Torne. Perëndia i kishte dhënë atij aftësi të mëdha si një biznesmen dhe një aftësi të posaçme për të ndihmuar të krishterët e tjerë me anë të dhuratave të tij bujare. Ai ishte me të vërtetë një pjesëtar i dobishëm i trupit të Krishtit, sepse ai e përdorte dhuntinë që Perëndia i kishte dhënë atij.

Por ndoshta ti po mendon: "Kjo vlen për të krishterët më të moshuar, por çfarë aftësisht ose dhuntish të veçanta mund të kem unë? Unë e di se jam i krishterë, por nuk jam i sigurtë se çfarë mund të bëj për të ndihmuar në punën e Perëndisë." Unë do t'ju tregoj për dy vëllezër dhe një motër që kishte të njëjtin problem. Djali më i madh quhej Filip; motra quhej Beth dhe vëllai i vogël, që ishte 9 vjeç, quhej Mark. Ata kishin dëgjuar në kampin Biblik që të gjithë të krishterët kanë dhunti të veçanta nga Perëndia, por ata nuk e dinin se cilat u kishte dhënë atyre Perëndia. Kështu ata vendosën një pasdite për të folur me zotin Orr, një nga këshilluesit e kampit, dhe i kërkuan atij ndihmë.

### Piktura V-7

Zoti Orr tha: "Kjo çështje e dhuntive dhe aftësive tona është diçka për të cilën secili prej nesh duhet të mendojë. Ne duhet t'i kërkojmë Perëndisë që të na shfaqë aftësitë tona dhe të ndihmojë që t'i përdorim ato për t'i shërbyer Atij dhe pjesëtarët e tjerë të trupit; por unë dua t'ju bëj disa sugjerime."

"Unë të kam ndjekur nga afër, Filip, që kur je bërë i krishterë dy vjet më parë. Ti je 12 vjeç tani, apo jo? Unë mendoj se e shoh diçka që ju ka dhënë Perëndia që të bëni. Tek Romakëve 12:8 Perëndia na flet rreth dhuntisë së "**nxitjes**".

Kjo është një fjalë e madhe, por do të thotë me të vërtetë të "nxisësh të tjerët në një mënyrë të prerë por miqësore." Unë të kam parë duke inkurajuar të tjerë. Për shembull, dje në mëngjes kur disa prej djemve nuk donin të linin lojën e futbollit për të shkuar në mësimin Biblik, unë të dëgjova tek i nxisje ata që të vinin. Pastaj kur disa prej tyre ishin dembelë dhe nuk donin të mësonin vargun Biblik, unë vura

re se si ti dhe një shembull të mirë dhe i ndihmove ata që të mësojnë. Unë mendoj që Beti dhe Marku mund të kujtojnë rastet kur ata ishin gati të hiqnin dorë nga detyrat e tyre të shtëpisë, por ti u lute me ta dhe i kërkove Perëndisë që t'i ndihmonte ata për t'i përfunduar; dhe ata i përfunduan. Unë mendoj se ndoshta ti ke dhuntinë e nxitjes ose inkurajimit. Puno me këtë dhunti dhe Perëndia do të të ndihmojë që ta kultivosh atë.

Filipi buzëqeshi me ndrojtje, por Beti dhe Marku mund ta shihnte se ai ishte i gëzuar se ndoshta e kishte atë aftësi të veçantë nga Perëndia. Ai ishte një inkurajues në trupin e Krishtit.

“Po ne?” thanë me një zë Beti dhe Marku.

“Ju në fakt jeni më të vegjël dhe nuk keni pasur aq shumë kohë për të shfaqur dhuntitë tuaja; por unë e di se Perëndia ju ka dhënë me siguri disa dhunti. Në të njëjtën mënyrë, Romakëve 12:8 flet për dhuntinë e **“veprave të mëshirës”**. A ju kujtohet Tabitha kur keni lexuar Veprat 9:36-43)? Ajo bënte shumë vepra të mëshirshme për të tjerët në Jopë. Ndoshta ti e ke këtë dhunti, Beti. Do të thotë të jesh e dashur dhe falëse, veçanërisht ndaj atyre që nuk e meritojnë. Dje kur Ana u soll keq me ty pas lojës së volejbolit dhe të shau, unë u gëzoja që ti nuk ia ktheve asaj. Ti u trishtove, por vazhdove të ishe e dashur me të kur askush tjetër nuk donte të rrinte me të. Kjo i ndihmoi të gjitha vajzat e tjera dhe sidomos Anën. Ndoshta Perëndia ju ka dhënë dhuntinë e të qenit veçanërisht i dashur e i mirësjellshëm, edhe me njerëzit që nuk sillen mirë me ty. Kjo është diçka që Perëndia mund ta përdorë në një mënyrë të mrekullueshme në ndihmë të të gjithë trupit të krishterëve.”

“Po unë?” tha Marku, që ishte 2 vjeç më i vogël se Beti.

“Dëgjo, Mark, ka një dhunti që ne nuk e kemi përmendur akoma. Në një libër tjetër që Pali ka shkruar, ai përmend dhuntinë e **“besimit”** (1 Korintasve 12:9). Do të thotë t'i besosh Perëndisë, edhe pse ti nuk mund t'i shohësh rezultatet. Në kohën tonë të lutjes në mësimin tonë të Biblës dje, unë të dëgjova duke u lutur veçanërisht për misionarin në Afrikën Perëndimore. Unë e di se ti beson që Zoti mund ta ndihmojë atë të mësojë gjuhën e

re. Është mirë që ti ke shumë dëshirë që njerëzit atje ta dëgjojnë Ungjillin në gjuhën e tyre.

Ti më kujton Stefanin, që ishte një njeri plot me besim. Ai u lut për ata që po i gjuanin me gurë (Veprat 6:8; 7:60). Perëndia iu përgjigj lutjes së tij dhe shpëtoi Saulin e Tarsusit, që mori pjesë në vdekjen e Stefanit. Ndoshta tërë jetën tuaj ju do të jeni një njeri plot me besim, si Stefani.”

Të tre fëmijët u nisën për të luajtur duke buzëqeshur. Ata donin me të vërtetë që të ishin pjesëtarë aktivë të trupit, dhe të bënë punën që Perëndia kishte zgjedhur për ta.

### Piktura V-8

Por çfarë donte Perëndia që Filipi, Beti dhe Marku të bënin tani? Dhe çfarë ishte më e rëndësishme, çfarë do Ai që ti dhe unë të bëjmë? Le të lexojmë vargun e parë të Romakëve 12 (lexoni 12-1): “Paraqisni trupin tuaj si fli të gjallë ..të Perëndia.” Kjo do të thotë që Perëndia do prej nesh t'i ofrojmë gjithçka që kemi dhe jemi që Ai t'i përdorë. A e keni vënë re që thuhet “fli të **gjallë**”, jo të vdekur. Ai të do të gjallë, të jetoni për Të dhe t'i shërbeni Atij, sepse ti e do Atë.

Djem dhe vajza të krishtera, a e doni Atë? Kur mendoni për të gjitha vuajtjet që Zoti Jezus Krisht pësoi në kryq për të të dhënë jetë të përjetshme, a të bën ta duash Atë dhe të dëshirosh ta kënaqësh Atë? Nëse po, ti mund t'ia thuash Atij këtë në një lutje të tillë, “Zot, të falënderoj që të përkas ty. Unë dua të të shërbej ashtu si ti dëshiron. Më ndihmo të të bindem, Ty që je Kreu i Trupit. Unë dua që të jem si një sy që të shoh nevojat e të tjerëve, ose si një gojë që të flas për Ty, ose si një këmbë për të ecur në rrugën Tënde. Amen.”

Edhe diçka tjetër, Perëndia thotë nëpërmjet Palit (*lexoni Romakëve 12:3*): “Sepse, ....unë i them secilit prej jush të mos e vlerësojë veten më shumë sesa duhet ta çmojë.” Perëndia nuk dëshiron që ne të jemi krenarë. Perëndia do që ne të jemi më të interesuar në Të dhe shërbesën tonë ndaj Tij, se sa të mendojmë rreth dhuntive specifike që ne kemi. Burrat dhe gratë e famshme të

besimit janë lutur: “Zot, çfarë Ti do që unë të bëj?” dhe “Zot, ja ku jam, dërgomë.” Kjo është më mirë sesa të pyesim, “Zot, për çfarë unë jam i mirë?” Ne duhet të duam të bëjmë vullnetin e Perëndisë dhe të nderojmë emrin e Tij, sesa të mendojmë shumë për veten. Falënderoni Perëndinë që Ai të ka dhënë një aftësi të veçantë, ose ndoshta më shumë se një. Kërkoji Atij se çfarë do Ai që ti të bësh si pjesë e trupit të Tij. Dhuntitë e Tij do të të aftësojnë për ta bërë këtë. Prandaj bindu Atij; zhvillo dhe përdor aftësitë që Perëndia të ka dhënë. Përdori ato për të ndihmuar të tjerët.

### Konkurs Përsëritës për Mësimin V

1. Kush e përbën Trupin e madh të Kishës? (*Çdo besimtar në Jezus Krishtin, çdo i krishterë i vërtetë.*)
2. Kush është Kreu i Trupit, të Kishës? (*Zoti Jezus Krisht.*)
3. Çfarë bën kreu? (*Drejton, kontrollon, komandon.*)
4. Çfarë bëjnë pjesët e tjera të trupit? (*Ndjekin udhëzimet e kreut.*)
5. Si i jep Zoti Jezus Krisht, Kreu i Kishës urdhrat e Tij për ne që jemi gjymtyrët e Trupit të Tij? (*Nëpërmjet Fjalës së Tij, kryesisht.*)
6. Çfarë i është dhënë çdo të krishteri si një pjesë e Trupit të Krishtit? (*Një dhunti ose aftësi e veçantë-ndoshta më shumë se një.*)
7. Përmendni dy dhunti të veçanta që u ka dhënë Perëndia të krishterëve, që ata t'i shërbejnë Atij.
8. Përmendni dy dhunti të tjera të veçanta.
9. Si quhet ai njeri që ka jetuar në Amerikë, i cili kishte dhuntinë e veçantë për të nxjerrë para dhe për t'ia dhënë Zotit? (*Zoti Le Torne.*)
10. Çfarë na kërkon Perëndia që të bëjmë para së gjithash, që ne ta njohim dhe të bëjmë vullnetin e Tij? (*Të paraqesim trupat tanë si një fli të gjallë-t'ia japim veten tonë Atij.*)

### Vargje për Mësimin V

Romakëve 12:1 “O vëllezër, po ju bëj thirrje, nëpërmjet dhembshurisë së

Perëndisë, ta paraqisni trupin tuaj si fli të gjallë, të shenjtëruar, të pëlqyer te Perëndia, që është shërbesa juaj e mençur.”

Romakëve 12:3 “Sepse, për hirin që më është dhënë, unë i them secilit prej jush të mos e vlerësojë veten më shumë sesa duhet ta çmojë, por të ketë një vlerësim të përkorë, sipas masës së besimit që Perëndia i ndau secilit.”

Romakëve 12:4 “Sepse, sikurse në një trup kemi shumë gjymtyrë dhe të gjitha gjymtyrët nuk kanë të njëjtin funksion.”

Romakëve 12:5 “Kështu edhe ne, megjithëse jemi shumë, jemi një trup në Krishtin dhe secili jemi gjymtyrë të njeri tjetrit.

Romakëve 12:6-8 “Dhe tani, duke pasur dhunti të ndryshme sipas hirit që na u dha, nëse kemi profecinë, të profetizojmë sipas masës së besimit; nëse kemi shërbim, le t'i kushtohemi shërbimit; po kështu mësuesi të jepet pas mësimit; dhe ai që nxit, le t'i kushtohemi shërbimit; po kështu mësuesi të jepet pas mësimit; dhe ai që nxit, le t'i kushtohemi nxitjes; ai që ndan, le ta bëjë me thjeshtësi; ai që kryeson le të kryesojë me zell; ai që bën vepra mëshire, le t'i bëjë me gëzim.”

Kolosianëve 1:1 “Ai vetë është kreu i trupit, pra i kishës; ai është fillimi, i parëlinduri nga të vdekurit, përdërisa të ketë parësinë në çdo gjë.”

# Mësimi VI

## Sa Shumë Detyrohemi

**Pasazhi i Shkrimit:** Romakëve 1:14-16; Romakëve 13, 14, 15.

**E Vërteta Qendrore:** Si të krishterë, ne i detyrohemi shumë Perëndisë dhe të tjerëve.

**Zbatimi për të shpëtuarit:** Dojeni dhe binduni Perëndisë në çdo situatë.  
Respektoni dhe binduni autoriteteve  
Jini miqësorë dhe të dashur me të tjerët.  
Jini të kujdesshëm dhe një shembull i mirë për të krishterët më të dobët.  
Përcilleni Ungjillin tek të pashpëtuarit.

**Vargu Përmendësh:** *“Mos i kini asnjë detyrim askujt, përveçse ta doni njëri-tjetrin”*  
(Romakëve 13:8).

### Skema:

- Piktura VI-1: Ilustrimi i Sandrës që i detyrohet 1200 leke Paulinës. Të gjithë besimtarët janë debitorë, që i detyrohen diçka të tjerëve. VQ.
- Piktura VI-2: Perëndisë ne i kemi detyrim dashurinë dhe bindjen tonë, për shkak të të gjithë hirit dhe mirësisë së Tij ndaj nesh (Romakëve 14:7-9).VQSH.
- Piktura VI-3: Autoriteteve të ndryshme ne i kemi detyrim respektin dhe bindjen tonë (Romakëve 13:1,5).VQSH.  
Historia e Suzanës dhe pagesa e detyruar ndaj autoriteteve të doganës.  
Pyetje konkurs
- Piktura VI-4: Historia e Neilit dhe respektit për forcat policore.
- Piktura VI-5: Historia e gangsterëve dhe e kabinës telefonike.  
Pyetje konkurs.
- Piktura VI-6: Secilit i kemi detyrim dashurinë dhe miqësinë tonë (Romakëve 13:8).  
Shembuj VQSH.
- Piktura VI-7: Të krishterëve më të dobët ne i kemi detyrim kujdesin dhe një shembull të mirë, që të mos i skandalizojmë. (Romakëve 14:13; 15:1-3a). VQSH.  
Historia e Xhekut dhe Bobit, dhe lojërave në video.  
Pyetje konkurs.
- Piktura VI-8: Të pashpëtuarve ne i kemi detyrim Ungjillin në shtëpi dhe më gjerë. (Romakëve 1:14, 15a; 15:19,20). VQSH.  
Nxitje për të qenë misionarë.

**Aktivite të Lidhura:** Shumë prej diskutimeve përfshihen gjatë mësim, dhe pyetjet konkurs zbatohen në tekst, prandaj nuk ka pyetje përsëritëse në fund.

**Drama:** Vazhdoni të përgatitni dramën “Vendim i gjykatësit”, që keni ndër mend ta paraqitni në takimin e ardhshëm.

**Skenë teatrale:** Disa fëmijë të grupit mund të luajnë me ndihmën tuaj një nga ilustrimet e mëposhtme që jepen në mësim:

- skena tek dogana, vetëm këtë herë Suzana e deklaroi sinqerisht vlerën e materialeve (*shihni komentarin për Figurën VI-3*);
- ose një polic që ndalon dikë i cili nuk po e nget makinën sipas rregullave.
- (*shihni pyetjen konkurs 5 nën komentarin për Figurën VI-4.*)

### Mësim për fëmijët e pashpëtuar në orën tuaj të mësim.

Meqenëse ky mësim është rreth të jetuarit të jetës së krishterë, është si rrjedhim e zbatueshme kryesisht për fëmijët e shpëtuar. Do të ishte mirë të përfshinit në një pjesë të hershme të programit diçka për të pashpëtuarit. Ata duhet ta dëgjojnë Ungjillin të shpjeguar qartë. Për shembull ju mund të ndani shkurtimisht me ta mesazhin e Librit Pafjalë, duke e

bazuar atë mbi librin e Romakëve. Shpjegoni që tek Romakëve 1-3 Pali paraqet nevojën tonë të madhe të shpëtimit që ilustron nga faqja e zezë. Në kapitujt 4 dhe 5 Pali shpjegon sesi Jezus Krishti vdiq për mëkatet tona (faqja e kuqe). Nuk kishte asgjë që ne mund të bënim për të shpëtuar veten, prandaj Zoti Jezus vdiq dhe u ringjall për mëkatet tona, që ne të kemi falje (faqja e bardhë) kur ne kthehemi nga gjërat e këqija dhe besojmë në Të. Shpjegoni që mësimi i sotëm është rreth faqes së gjelbër-të rritesh në jetën e krishterë; por nxitini fëmijët e pashpëtuar që ata duhet ta pranojnë këtë jetë para se të fillojnë të rriten.

Ose, në vend të Librit Pafjalë, ju mund të mësoni një mësim **të shkurtër** ungjillizues me objekte. Megjithatë, sigurohuni që t'i ndani dy blloqet e mësimin duke pasur disa këngë ose kohën e përsëritjes në intervalin midis tyre. Mësimi me objekte që u adresohet veçanërisht të pashpëtuarve duhet të paraqitet fillimisht dhe ky mësim "Sa shumë detyrohemi" më vonë.

## Mësimi

### Piktura VI-1

Sandra dhe shoqja e saj Paulina kishin shkuar për të bërë pazar të shtunën në mëngjes. Ata po kënaqeshin duke shikuar nëpër dyqane. Të dy vajzat panë disa blloqe me letra ngjitesë që iu pëlqenin shumë dhe vendosën t'i blinin ato. Por atëherë Sandra zbuloi që ajo nuk kishte mjaft para, meqë kishte blerë tashmë një rrip të ri ore. Asaj i mungonin 1200 leke.

"Mos u shqetëso," tha Paulina, "Unë do të t'i jap hua dhe ti mund të mi kthesh të hënën." "Dakord," tha Sandra, "Unë kam para të tjera në shtëpi." Ajo u lehtësua që shoqja e saj do ta ndihmonte atë. Atë fundjave asaj nuk i hiqej nga mendja ky mendim: "Unë duhet t'ia kthej këto para Paulinës. Nuk duhet të harroj, se nuk dua që ajo të m'i kërkojë ato."

A i ke qene detyruar ndonjëherë një shoku për para? Ndoshta po dhe natyrisht ju e dini se t'ia ktheni ato sa më shpejt që të jetë e mundur. Perëndia na mëson tek Romakëve që të gjithë ne që kemi pranuar Zotin Jezus në jetët tona jemi në një farë mënyre borxhlinj. Kjo do të thotë që ne u detyrohemi diçka të tjerëve. Ndoshta kjo është një befasi për ju. Natyrisht unë nuk e kam fjalën për para këtë herë.

### Piktura VI-2

Para së gjithash ne i detyrohemi diçka Perëndisë. Ai na ka dhënë shumë. A mund të mendoni për disa nga gjërat e mrekullueshme që na ka dhënë Perëndia dhe të cilat ne mund t'i shohim në jetët

tona të përditshme? (*Le të përgjigjen fëmijët; ata mund të sugjerojnë gjëra të tilla si prindër, familje, lojëra, ushqim, shëndet, Bibla, bukuritë e natyrës, etj.*) Po, ashtu është. Tani le të mendojmë për disa bekime të mrekullueshme që na ka dhënë Perëndia të cilat nuk mund të shihen prej syrit njerëzor. (*Le të përgjigjen fëmijët; ata mund të sugjerojnë Krishtin që ka vdekur për ne, faljen e mëkateve, jetën e përjetshme, sigurinë e të shkuarit në parajsë, Frymën e Shenjtë që jeton në ne, Zotin Jezus që lutet për ne, etj.*) Po, këto ishin përgjigje të mira.

Ne nuk mund t'i paguajmë kurrë bekimet që na ka dhënë Perëndia. Mirësia dhe dashuria e Tij ndaj nesh është aq e madhe saqë ne nuk mund t'ia kthejmë kurrë Atij të gjithë ato gjëra që Ai na ka dhënë. Por ne mund t'i japim **diçka** Perëndisë, që t'i tregojmë se e vlerësojmë seriozisht tërë mirësinë e Tij ndaj nesh. Çfarë tjetër i detyrohemi Atij?

I kemi detyrim dashurinë dhe bindjen tonë. (*Një nga fëmijët të lexojë Romakëve 14:7-9*). Pali ka shkruar "Sepse për këtë edhe vdiq Krishti dhe u ngjall e u kthye në jetë: që të **zotërojë**." Çfarë do të thotë që Krishti të jetë Zot? Po, do të thotë që ne duhet t'i bindemi Atij në çdo gjë. Perëndia do që t'i bindeni Atij meqë e doni Atë dhe jo thjesht se duhet ta bëni këtë. Thuaji Atij çdo ditë që ti e do Atë dhe që do të bësh gjërat e duhura. Ai do të të ndihmojë që të mësosh atë që është e drejtë ndërsa lexon Biblën dhe dëgjon të tjerët që e mësojnë atë. Ti do të duash t'i bindesh Atij sepse Ai është Zot.

### Piktura VI-3



Por ne i detyrohemi diçka edhe të tjerëve. Le të lexojmë 2 vargje dhe të shohim nëse mund ta gjeni (*dikush le të lexojë Romakëve 13:1,5*): “Çdo njeri le t’i nënshtrohet **pushteteve të sipërm**. Prandaj është e nevojshme t’i nënshtroheni, jo vetëm nga druajtja e zemërimit, por edhe për arsye të ndërgjegjes.” Cilët janë këto “pushtete të sipërme” sipas mendimit tuaj? Ato janë pushtetet e qytetit dhe vendit tonë, që formulojnë ligjet dhe kërkojnë nga ne që t’i zbatojmë. Perëndia na mëson që duhet t’u nënshtrohemi atyre; kjo do të thotë që ne jemi nën autoritetin e tyre dhe duhet t’u bindemi atyre. Më lejoni t’ju tregoj tre histori të shkurtra. Ju duhet t’i dëgjoni me kujdes, pasi në fund të secilës ne do të kemi një konkurs me pyetje. Ne do të shohim së bashku nëse njerëzit në këto histori u janë bindur apo jo autoriteteve ashtu si ka thënë Perëndia që duhet të binden.

### Historia e parë

Suzana dhe Marjeta sapo ishin kthyer në shkollë nga pushimet verore. Ato ishin duke pritur në oborrin e shkollës para se nxënësit të futeshin brenda. Suzana po i tregonte shoqes së saj Marjetës rreth pushimeve të mrekullueshme që familja e saj kishte kaluar në një vend tjetër. “Ne kishim një kohë fantastike,” tha Suzana. “Ne shkuam me avion dhe atje blemë një video të mrekullueshme. Atje janë shumë më të lira se këtu. Kur po ktheheshim nëpërmjet aeroportit të Londrës, a e di se çfarë bëmë? Kur arritëm tek dogana (aty ku duhet të thuash nëse ke blerë gjëra me vlerë kur ke dalë jashtë vendit), ne nuk kaluam përmes portës së kuqe ashtu si duhet të kalonim. Zyrtarët e doganës do të na kishin kërkuar para shtesë që të paguanim ndaj qeverisë meqenëse kishim futur videon nga jashtë vendit. Por jo, ne kaluam përmes portës së gjelbër ku futesh atëherë kur nuk ke blerë ndonjë gjë me vlerë dhe nuk ke asgjë për të deklaruar. Askush nuk na ndaloj dhe kështu ne e morëm videon tonë 30 paund më lirë, sepse nuk paguam doganën.” (*Mësues, përshtatni vendin, emrat, monedhën,*

*artikullin e importuar, etj., sipas situatës suaj.*)

Tani le të kemi konkursin me pyetje dhe të mendojmë pak rreth historisë sonë të parë:

1. Cilave pushtete nuk iu bind familja e Suzanës? (*Pushteteve të doganës.*)
2. Pse është gabim që ta bësh këtë? (*Sepse Perëndia thotë tek Romakëve 13 që duhet t’u bindemi atyre.*)
3. Çfarë duhet të bëjë një familje e krishterë me doganën? (Të deklarojë kur ka blerë ndonjë gjë me vlerë dhe po të jetë e nevojshme të paguajë detyrimin.)

### Piktura VI-4

#### Historia e Dytë

Është zbavitëse të gjesh përgjigjet, apo jo?

Neil po rrinte me tezen e tij një fundjavë dhe bëri një shëtitje në periferi të qytetit. Ndërsa u kthye në një qoshe të rrugës kryesore, ai pa diçka shumë frikësuese. Ishte një turmë me burra dhe djem të rinj që marshonin nëpër rrugë, duke mbajtur flamurë. Ata u përpoqën të marshonin në një ndërtesë të madhe, por policia nuk i lejoi që të hynin në të. Papritur burrat filluan të hidhnin gurë dhe shishe, duke thyer dritare dhe duke dëmtuar ndërtesën. Ata u hidhnin gurë edhe policëve dhe u bërtitnin atyre duke i quajtur ata kafshë dhe derra. Policët mbanin helmetat e ngritura dhe filluan të ecnin përpara që t’i shpërndanin burrat. Por turma i sulmoi ata dhe i gjuajti me shqelma; një polic madje u lëndua shumë. Neili qeshi me vete duke menduar, “mirë ia bënë meqë donte t’i ndalonte ata.”

Tani le të mendojmë pak për pyetjet e konkursit tonë për këtë histori:

1. Cilave pushtete nuk po iu bindeshin burrat dhe djemtë e rinj? (*Policisë.*)
2. Pse është gabim për ta bërë këtë? (*Sepse Bibla na thotë tek Romakëve 13 që t’u bindemi atyre; thotë që ata të cilët kërkojnë që ne të zbatojmë ligjin janë caktuar nga Perëndia.*)
3. A mendoni se policët bëjnë ndonjëherë gabime? (Po, natyrisht; por ne duhet të kemi shumë kujdes që megjithatë t’u bindemi atyre.)

4. A mendoni se policët kanë një punë të lehtë apo të vështirë? Pse? (*Është një punë e vështirë, veçanërisht në kohën e sotme.*)
5. Çfarë detyrash të pakëndshme duhet të bëjnë policët? (*Fëmijët do të përmendin ndoshta kapjen e kriminelëve dhe që shoferët të zbatojnë rregullat e qarkullimit. Ju duhet të theksoni faktin që gjobitja e atyre që e ngasin makinën shumë shpejt, dhe që e ngasin të pirë, apo që e parkojnë në vende të papërshtatshme, etj. është një punë e pakëndshme për policin, por është detyra e tyre për mbrojtjen dhe të mirën e të gjithë qytetarëve që ngasin makinën.*)
6. Nëse Neil do të kishte qenë i krishterë, si duhet të silllej ai? (*Atij duhet t'i kishte ardhur keq për policin e lënduar dhe nuk duhet të kishte qeshur me atë që i ndodhi atij; do të ishte mirë që të paralajmëroni fëmijët që të rrinë larg nga trazirat.*)
7. Çfarë i detyrohemi policisë? (Respektin dhe lutjet tona.)

### Piktura VI-5

#### Historia e Tretë

Një natë 4 djem të rinj dolën jashtë në errësirë për të bredhur rrugëve. Ata nuk kishin asnjë punë për të bërë dhe nuk dinin se si ta kalonin kohën. “Unë e di se çfarë duhet të bëjmë,” tha Henri, “Le të nxjerrim disa para nga automatët e kabinave telefonike.” Ata filluan të ecnin një copë rruge derisa arritën tek kabina e parë telefonike. Henri nxori nga xhepi i pantallonave të tij blu xhins një kaçavidë të madhe dhe filloi të lironte vidat e automatit. Ai e goditi, e shkundi aparatit derisa më në fund dolën me kërkëllitje 700 monedha në kutinë e vogël metalike. “Këto janë të gjitha?” thirri ai i indinjuar; dhe ndërsa tre shokët e tij e ndiqnin, ai e shkuli me tërë forcën kabllon e telefonit dhe e këputi. Pastaj të katër i ranë me shqelma xhamave të dyerve dhe i thyen ato, duke lënë në dysheme copat e thyera të xhamit. “Le të provojmë edhe një tjetër kabinë telefoni se mos marrim edhe më shumë para,” tha Henri, drejtuesi i

gangsterëve, ndërsa ata ecnin në rrugë. Gjatë rrugës, ata thyen pemët e vogla që ishin mbjellë jo shumë kohë më parë në trotuar.

Tani le të përpiqemi që t'i përgjigjemi pyetjeve të konkursit për këtë histori:

1. Cilave autoriteteve (pushteteve të sipërme) nuk po u bindeshin 4 djemtë e rinj? (*Kompanisë telefonike që kërkon pagesat tona për përdorimin e telefonave. Dhe këshillin bashkiak të qytetit, që i ka mbjellë pemët dhe kërkojnë që të mos dëmtojmë pronën publike.*)
2. Pse është e gabuar që ta bëjmë këtë? (*Sepse Perëndia na thotë tek Romakëve 13 që t'u nënshtrohemi pushteteve që janë mbi ne.*)
3. Këta djem të rinj po i vidhnin paratë kompanisë telefonike. A mund të mendoni për pushtete të tjera të cilët njerëzit përpiqen t'i mashtrojnë? (*Ata që mbikëqyrin në trena dhe autobusë kur nuk paguhen biletat; pushtetet qeveritare kur nuk paguhen licencat për mbajtjen e qenve, TV., etj.*)

### Piktura VI-6

Ne u jemi “borxhlinj” të tjerëve. Ne i kemi detyrim Perëndisë bindjen dhe dashurinë tonë; i kemi detyrim respekt dhe bindje pushteteve. Dhe ne lexojmë diçka tjetër tek Romakëve (*dikush të lexojë Romakëve 13:8*): “Mos i kini asnjë detyrim askujt, përveç se ta doni njëri-tjetrin.” A e kuptoni se çfarë është duke thënë Perëndia në këtë varg? Ai thotë që ne i kemi detyrim dashurinë dhe miqësinë tonë gjithkujt? A kërkon Perëndia nga ne që të jemi të dashur dhe miqësorë me të gjithë? Po, Ai do! Ai thotë që ne ia kemi detyrim atyre këtë. Nuk është gjithnjë e lehtë, apo jo? Nuk është shumë e vështirë të pëlqesh të tjerët që janë të mirë me ne; por si do të silleni me ata që nuk janë të mirë me ne? Perëndia na thotë që duhet t'i duam edhe ata.

Nuk është gjithnjë e lehtë për të qenë të dashur dhe miqësorë me dikë që sapo ka ardhur në klasën tuaj. Ai nuk është një prej shokëve tuaj më të ngushtë dhe ti nuk do që të marrësh mundimin për t'i dashur ata. Nuk është gjithnjë e lehtë të jesh i dashur me dikë që ka një ngjyrë të

ndryshme të lëkurës ose një kombësi të ndryshme. Por Perëndia do që ti të jesh i dashur. Nëse ti je i krishterë, ti duhet të jesh një nga të parët që duhet ta mirëpresin një person të ri në klasë. Le të mendojmë! Si **do ta** bënit një fëmijë të ri të ndjehet i mirëpritur në klasën tuaj?

*(Përgjigje të mundshme: hani drekë së bashku, luani së bashku, ftojini atë në shtëpinë tuaj ose në një festë, bëjeni së bashku detyrën e shtëpisë, prezantoje atë me shkollën, shpjegojini atij rregullat.)*

Disa herë është e vështirë për të qenë të dashur me dikë që është më i zgjuar se ju dhe ka nota të mira në shkollë. Ju ndjeheni xhelozë, por Perëndia na tregon që ne i kemi detyrim miqësinë dhe dashurinë tonë **çdo njeri**. Si mund t'i kapërceni ndjenjat xheloze?

*(Përgjigje të mundshme: rrëfejani xhelozinë Zotit dhe i kërkonti Atij që t'ju largojë, sepse është mëkat; lutuni për personin tjetër; shikoni për mënyra sesi të tregoni mirësi dhe ta lavdëroni atë për anët e tij më të mira; i kërkonti atij ndihmë nëse mundet, në lëndën ku ai është më i fortë.)*

Kërkoji Perëndisë të të ndihmojë që të jesh i dashur me **çdo njeri**. Kujtoni që Fryma e Shenjtë jeton në ty, që të të ndihmojë për të kënaqur Perëndinë. Ti do të shikosh gjithashtu se do të bësh shokë të rinj ndërsa i bindesh Perëndisë.

## Piktura VI-7

Ndoshta ti ke qenë i krishterë për një farë kohe-ndoshta për një vit ose më shumë. Ka shumë njerëz që të ndjekin me shumë interes, për të parë sesi sillesh ti si i krishterë. Të pashpëtuarit të ndjekin dhe natyrisht, vetë Perëndia të ndjek me dashuri. Megjithatë, unë e kam fjalën për ata djem dhe vajza të krishtera që nuk e kanë njohur Zotin për një kohë të gjatë, dhe për ata që nuk kanë pasur aq shumë mësim Biblike sa ke pasur ti në shtëpitë e tyre dhe në Klubin e Lajmit të Mirë. *(Dikush le të lexojë Romakëve 14:13.)*

Perëndia na thotë që të jemi të kujdesshëm që “askush të mos skandalizojë vëllain e tij.” A e kuptoni ju mirë këtë? Ne duhet të jemi të kujdesshëm, nga gjërat që bëjmë ose themi, që të mos skandalizojmë dikë dhe

ta shtyjmë të bjerë në mëkat. Pali u tha të krishterëve në Romë, për shembull, se nëse ata do të hanin nga mishi i një kafshe të flijuar për një idhull pagan, kjo do ta hutonte dhe skandalizonte një të krishterë më të dobët. Natyrisht mishi ishte i njëjtë me atë të zakonshmin, por duke e ngrënë atë, një i krishterë i ri mund të mendonte se të adhuroje idhujt ishte diçka e drejtë. Prandaj të krishterët më të rritur duhet të mos ta hanë këtë mish. Sot ne nuk e kemi këtë problem, por lermëni t'ju jap një shembull tjetër. Në fund të historisë do të ketë disa pyetje të tjera.

Xheku ishte një djalë i mirë i krishterë. Ishte shpëtuar në kamp 3 vjet më parë, kur ishte 8 vjeç. Ai po rritej mirë në jetën e krishterë, ndërsa lexonte Biblën në shtëpi dhe studionte gjithashtu Fjalën e Perëndisë në mësimin e së Dielës dhe Klubin e Lajmit të Mirë. Ai shkonte mirë edhe në shkollë. Por çdo ditë pas shkolle, ai shkonte tek një vend në qytet ku luanin lojëra me video. Ai luante me automatët për një gjysmë ore para se të fillonte detyrat e shtëpisë.

Një ditë Bobi e pa Xhekun duke shkuar për të luajtur me video. Bobi ishte 8 vjeç dhe sapo e kishte pranuar Zotin Jezus Krisht si Shpëtimtarin e tij 2 javë më parë. Ai nuk shkonte shumë mirë në shkollë. Por kur ai pa Xhekun duke shkuar në vendin ku luhej me video, mendoi me vete: “Kur Xheku që është një i krishterë i mirë e bën këtë, edhe unë mund ta bëj.” E kështu Bobi filloi të shkonte çdo ditë; por ai nuk mund të qëndronte vetëm për një kohë të shkurtër, si Xheku. Ai qëndronte për një orë e gjysmë çdo ditë. Për shkak të kësaj ai u fut në telashe me prindërit e tij; i duhej gjithashtu t'i kalonte me nxitim detyrat e shtëpisë dhe shpesh nuk i bënte mirë ato; për shkak se kishte shumë pak kohë dhe nuk shkonte gjithnjë mirë me prindërit e tij, ai e linte pa lexuar Biblën dhe nuk lutej ashtu si duhet.

Më poshtë ndodhen pyetjet e konkursit:

1. A duhet të vazhdojë Xheku të shkojë për të luajtur në lojërat e videos, edhe pse i pëlqen dhe nuk i bën keq? *(Le të përgjigjen fëmijët. Do të ishte mirë që njëri prej tyre të lexojë në fund Romakëve 14:13 dhe dikush tjetër Romakëve 15:1,2,3a: “Edhe ne, që*

*jemi të fortë, duhet të mbajmë dobësitë e atyre që janë të dobët dhe jo t'i pëlqejmë vetes. Secili nga ne le t'i pëlqejë të afërmit për të mirë, për ndërtim, sepse edhe Krishti nuk i pëlqeu vetes së tij." A nuk na mëson kjo që Xheku duhet të jetë gati për të hequr dorë nga diçka që atij i pëlqen, për të mirën e Bobit?)*

2. A do të ishte e vështirë për Xhekun që të hiqte dorë nga lojërat e videos pasditeve? *(Po, do të ishte, por Zoti do ta ndihmonte.)*
3. Si do të ndjehej ai kur nuk do të shkonte më në sallën e lojërave me video? *(Ai ndoshta do të ndjehej i trishtuar, por në të njëjtën kohë Perëndia do ta bënte atë të ndjehej i gëzuar që mund ta ndihmonte Bobin në këtë mënyrë. Perëndia na shpërblen ne në një farë mënyre, nëse ne bëjmë atë që është e drejtë.)*
4. A mund të mendoni për ndonjë gjë tjetër që një i krishterë më i vjetër mund të bëjë sepse i pëlqen, por diçka që duhet ta ndalojë nëse do të ishte një problem ose një skandal për një të krishterë më të dobët? *(Mësues, kjo është një pyetje shumë e vështirë dhe ju mund të mos gjeni ndonjë përgjigje. Ata mund të sugjerojnë gjëra të tilla si një program televiziv me këngë të muzikës pop dhe një libër komik.)*

me Ungjillin. A ndjehemi ne në këtë mënyrë? Është si Sandra që mendonte vazhdimisht, "Unë i kam disa para Paulinës." A mendon ndonjëherë "Unë i kam borxh Ungjillin atyre që jetojnë në rrugën ku jetoj"? A i fton ti ata në Klubin tuaj për të dëgjuar Ungjillin? A u jep atyre ndonjë broshurë me Ungjillin? A lutesh ti për ta, që ata të mund të njohin Jezusin?

Unë shpresoj që sot, ndërsa kemi folur për gjëra që u detyrohemi të tjerëve, ju do të mendoni shumë rreth detyrimit që keni për t'ju sjellë Ungjillin të pashpëtuarve-shokëve të lagjes dhe njerëzve që jetojnë në vende të tjera. Ndoshta një ditë Perëndia do të të thërrasë që të jesh misionar në një vend të huaj, si Pali. Ai mund të të tregojë se Ai do prej jush që ta predikosh Ungjillin "atje ku nuk ishte i njohur emri i Krishtit" tek ata që nuk e njohin dhe duan emrin e Jezusit. Mendo për këtë dhe kërkoji Perëndisë që të të tregojë vullnetin e Tij për jetën tënde. Çfarë privilegji është t'ia përcjellësh Ungjillin nevojtarëve në vende të tjera!

## Piktura VI-8

Në kapitullin e parë të librit të Romakëve, Pali shkroi këto *fjalë (dikush të lexojë Romakëve 1:14,15a)*: "Unë u jam borxhli Grekëve dhe barbarëve, të diturve dhe të paditurve. Kështu, aq sa varet nga unë, jam gati t'ju predikoj ungjillin." Kur Pali arrin në fund të letrës së tij ai shkruan diçka tjetër *(dikush të lexojë Romakëve 15:19,20)*: "Kam kryer shërbimin e ungjillit të Krishtit, duke u përpjekur të ungjillëzoj atje ku nuk ishte i njohur emri i Krishtit." Pali tha që ai ia kishte detyrim Ungjillin të pashpëtuarve. Ai ishte gati të shkonte në vende ku njerëzit as nuk e kishin dëgjuar emrin e Krishtit. Ai kishte shumë dëshirë që nëpërmjet Ungjillit ata të ktheheshin në besim dhe të merrnin jetën e përfjetshme. Ai e dinte se i **detyrohej** të pashpëtuarve

## Vargje për Mësimin VI

Romakëve 1:14,15a “Unë u jam borxhli Grekëve dhe barbarëve, të diturve dhe të paditurve. Kështu, aq sa varet nga unë, jam gati t’ju predikoj ungjillin.”

Romakëve 13:1,5 “Çdo njeri le t’i nënshtrohet pushteteve të sipërm, sepse nuk ka pushtet veçse prej Perëndisë; dhe pushtetet që janë, janë caktuar nga Perëndia. Prandaj është e nevojshme t’i nënshtroheni jo vetëm nga druajtja e zemërimit, por edhe për arsye të ndërgjegjes.”

Romakëve 13:8 “Mos i kini asnjë detyrim askujt, përveç se ta doni njëri-tjetrit, sepse Ai që e do tjetrit e ka përmbushur ligjin.”

Romakëve 14:7-9 “Sepse asnjë nga ne nuk jeton për veten e tij dhe askush nuk vdes për veten e tij, sepse, edhe nëse rrojmë, rrojmë për Zotin; edhe nëse vdesim, vdesim për Zotin; pra, edhe po

të rrojmë ose të vdesim, të Zotit jemi. Sepse për këtë edhe vdiq Krishti dhe u ngjall e u kthye në Jetë: që të zotërojë edhe mbi të vdekurit, edhe mbi të gjallët.”

Romakëve 14:13 “Prandaj të mos e gjykojmë më njeri tjetrin, por më tepër gjykoni këtë: mos vini gur pengese ose skandal vëllait.”

Romakëve 15:1,2,3a “Edhe ne, që jemi të fortë, duhet të mbajmë dobësitë e atyre që janë të dobët dhe jo t’i pëlqejmë vetes. Secili nga ne le t’i pëlqejë të afërmit për të mirë, për ndërtim, sepse edhe Krishti nuk i pëlqeu vetes së tij.”

Romakëve 15:19,20 “Me fuqi shenjash dhe çudirash, me fuqi të Frymës së Perëndisë; kështu, prej Jeruzalemit e përqark dhe gjer në Iliri, kam kryer shërbimin e ungjillit të Krishtit, duke u përpjekur të ungjillizojë atje ku nuk ishte i njohur emri i Krishtit, që të mos ndërtoj mbi themelin e tjetrit.”

## Dramë-Vendimi i Gjykatësit

Kjo dramë ose skeç i shkurtër bazohet në ilustrimin e Xhekut dhe Kevinit që përdoret në 3 mësimet e para të serisë mbi Romakëve. Ka 4 skena të shkurtra. Është shkruar për 9 aktorë dhe një

tregues, por mund të përshtatet: për shembull në vend të 2 policëve ju mund të keni një ose tre; ju mund të keni më shumë se një bashkëpunëtor; fëmijë të tjerë mund të jenë spektatorë në gjyq, ose dëshmitarë, etj.

Fëmijëve u pëlqejnë dramat dhe mund t'i kujtojnë mirë skenat që luajnë. Drama mund të përdoret:

1. Për një program të veçantë në të cilin ju ftoni prindërit-që t'i njihni ata dhe t'u paraqitni atyre Ungjillin në një mënyrë interesante. Nëse fëmija i tyre ka një pjesë në dramë, ka më shumë të ngjarë që një prind të vijë në programin e veçantë.
2. Si një mësim shtesë në serinë (mund të luhet për javën 7). Mënyra më e mirë është që fëmijët t'i mësojnë rreshtat e tyre dhe të vishen me kostume të thjeshta por të përshtatshme për rolet e tyre. Natyrisht kjo kërkon kohë për të mësuar dhe përsëritur. Ju mund të keni nevojë edhe për disa objekte skenike"-disa karrige, një tryezë, një revole për sulmin mbi zotin Tod, një telefon, një automat monedhash, një litar, një çantë, disa kartëmonedha, etj. Nëse nuk keni kohë që fëmijët të mësojnë rolet e tyre, ata mund të lexojnë rolet e tyre, por natyrisht kjo mënyrë nuk është interesante ose tërheqëse për ata që dëgjojnë, ose edhe për ata që marrin pjesë.

Kur të zgjidhni personazhet, sigurohuni që "Maria" të jetë një e krishterë, në mënyrë që dëshmia e saj në fund të tingëllojë e vërtetë.

**Skena** *(Dy djem duke studiuar.)*  
Kevin: Le të shkojmë për të luajtur futboll, Xheku. Më ka ardhur në majë të hundës me këto studime.  
Xheku: Më vjen keq, Kevin, por nuk mund të dal sonte, se kam një provim javën tjetër dhe kam akoma shumë për të përsëritur. Por thuaju djemve që të më presin për  
Zoti Tod: Nuk do të shpëtosh pa u ndëshkuar nga kjo që po bën! Dhe sidoqoftë unë

ndeshjen e të shtunës. Unë nuk mund ta humbas atë!

Kevin: Ah ti me ato studimet e tua! Ti studion shumë! Mua më pëlqen të dëfrehem. Çfarë rëndësie ka ta marrësh provimin? Ka mënyra më të lehta për të jetuar përveç punës, ti e di! Nëse ti nuk mund t'i fitosh paratë e tua, ti mund të ndihmohesh gjithnjë nga ata që kanë me bollëk.

Xheku: Oh Kevin, mos fillo të presësh ndihmë nga të tjerët. Kjo është e gabuar dhe nëse fillon në këtë rrugë do të shkohet keq e më keq.

Kevin: Mos u shqetëso për mua. Unë mund të kujdesem për veten! (Të dy djemtë dalin jashtë.)

Rrëfenjësi: Vitet kaluan pas kësaj bisede. Xheku studioi shumë dhe e mori provimin në shkollë dhe universitet, dhe u bë një gjykatës i famshëm. Por Kevin vazhdoi të ecte në rrugën e gabuar. Ai bënte shumë pak punë. Ai e la shkollën pa bërë provimet. Ai nuk mund të qëndronte në një punë sepse sillej keq. Pastaj u fut në një bandë gangsterësh. Me ta ai filloi të vidhte dhe të hynte në telashe me policinë.

**Skena 2** *(Zoti Tod është në banak, me një telefon dhe një arkë monedhash. Dy gra janë duke shikuar disa kartolina. Kevin hyn brenda, vesh një çorap nailoni në fytyrën e tij dhe nxjerr revolen.)*

Rrëfenjësi: Skena ndodh në një zyrë të postës, pjesë e një dyqani që është pronë e zotit Tod.

Kevin: Duart lart. Dorëzo të gjitha paratë ose do të qëllohesh. kam vetëm pak para për disa pensionistë.

Kevin: Unë dua gjithçka që të kesh. I vini edhe këto mandate postare. Ju të dyja ngjeshuni pas murit dhe ngrini duart.

Zoti Tod: Mos i bëj gjë këtyre grave! Merr gjithçka, por nuk dua që për punë parash të vritet ndonjë njeri.

Kevin: Vëri të gjitha në këtë çantë. (Ai u largua me vrap.)

Zoti Tod: (*Duke ngritur telefonin.*) Alo, policia? Jam zoti Tod në Hillsaid Kreshent. Ka patur një vjedhje këtu në postën lokale. A mund të vini shpejt?...Dakord, do të presim.

(*2 policë hyjnë brenda me vrap.*)

Polici i parë: Zoti Tod, sa para mori me vete hajduti?

Zoti Tod: Pak më shumë se 500 paund dhe disa mandaposta.

Polici i dytë: A e dallove se kush ishte ai?

Zoti Tod: Jo, por një nga gratë e ka parë pak fytyrën e tij, kur ai hyri në dyqan.

Zonja Stjuart: Po, unë e pashë atë para se të vinte çorapen mbi fytyrën e tij. Ai më kujtoi një djalë që shkonte në shkollë me djalin tim më të madh, Maikun.

Polici i parë: Nëse ne të tregojmë fotografitë e nxënësve të shkollës në kohën e djalit tënd Maik, a mendoni se do ta njihnit atë?

Zonja Stjuart: Po, do ta njihja.

### **Skena 3** (*Salla e gjyqit*)

Rrëfenjësi: Njëpërmjet një fotografie të shkollës Kevin u zbulua. Policia gjeti mandapostat dhe një pjesë të parave në dhomën e tij. Kevin u dërgua në dhomat e izolimit dhe më vonë ai u soll në sallën e gjyqit i akuzuar për sulm mbi personin dhe vjedhje.

(*Xheku, gjykatësi hyn në sallë dhe ulet. Kevin hyn, i shoqëruar nga dy policë.*)

Kevin: (*Ngre sytë dhe thotë me vete.*) E pabesueshme. Është vëllai im, Xhek. Unë nuk e di nëse ai do të më njohë. A do të më trajtojë mirë se jam i vëllai? Unë mendoj se jo, sepse është gjykatës.

Xheku:, Nuk është e mundur! Ky është vëllai im Xhek. Kjo është e tmerrshme! Gjykatësi Unë ia kisha frikën se një ditë ai do të përfundonte në duart e drejtësisë.

Sekretarja e gjyqit: Kjo çështje ka të bëjë me një vjedhje që ka ndodhur të hënën më 11 mars rreth orës 9.30 në zyrën e postës lokale në Hillsaid Kreshent. I akuzuari, Kevin Metjus, është këtu në bankën e të pandehurve.

Xheku: A mund të ngrihet zonja Stjuart, dhe t'i tregojë gjykatës se çfarë ke parë të ndodhë në zyrën e postës mëngjesin e 11 marsit.

Zonja Stjuart: Ky person hyri në zyrën e postës, vuri mbi kokë një çorapë nailoni, por unë arrita t'ia shoh mirë fytyrën. Ai sulmoi zotin Tod dhe i kërkoi që t'i dorëzonte gjithçka që kishte arka e monedhave: dhe zoti Tod e bëri këtë.

Polici i parë: Zonja Stjuart e njohu të akuzuarin sepse kishte qenë në të njëjtën shkollë me djalin e saj dhe më vonë ajo e identifikoi atë si hajduti, kur ne bëmë një verifikim personash në dhomat e izolimit.

Polici i dytë: Kur ne shkuam në shtëpinë e të pandehurit me një urdhër bastisjeje, ne gjetëm 230 paund në kartëmonedha të fshehura në një kuti, bashkë me

mandapostat që ishin vjedhur.

Xheku: A ka ndonjë gjë për të thënë i pandehuri në mbrojtjen e tij?

Kevin: Asgjë, Shkëlqesia juaj. Kjo është hera e parë që jam në një gjyq.

Xheku: *(Duke menduar me vete.)* Çfarë duhet të bëj unë? A duhet ta lë të lirë sepse është vëllai im. Jo, unë nuk mund ta bëj këtë. Unë jam gjykatës dhe duhet të bëj atë që është e drejtë. Unë duhet t'i ndëshkoj keqbërësit. *(Duke u kthyer nga Kevin.)* Unë të shpall fajtor dhe të urdhëroj që të paguash një gjobë prej 500 paund ose të shkosh në burg për 5 muaj.

Zonja Stjuart: Gjykatësi po jep një ndëshkim të rreptë megjithëse i pandehuri është vëllai i tij.

Kevin: 500 paund! Unë nuk mund ta paguaj këtë shumë dhe kështu do të më duhet të shkoj në burg. *(Xheku ngrihet nga karrigia e tij dhe shkon tek sekretarja e gjyqit.)*

Xheku,: Unë e kam dënuar këtë person për të paguar 500 paund, por tani unë do ta paguaj vetë këtë shumë. *(Xheku nxjerr nga xhepi kuletën e tij dhe i dorëzon sekretares 500 paund.)*

Kevin: Nuk mund ta besoj dot! Ai kishte të drejtë të më gjobiste, por tani ai e paguajti vetë gjobën për mua.

Xheku: Lirojeni të burgosurin! *(Kevin lirohet dhe fillon të ecë për të dalë nga salla e gjyqit.)*

Zoti Tod: Hej, ti nuk mund të dalësh nga salla e gjyqit, pa paguar gjobën.

Kevin: Unë jam i lirë, sepse vëllai im, gjykatësi, ka paguar të gjithë gjobën për mua,

prandaj ti nuk mund të më detyrosh që ta paguaj atë përsëri. Unë jam i lirë tani, sepse gjoba u pagua.

**Skena 4** *(Një tryezë me një karrige në çdo skaj.)*

Rrëfenjësi: Skena ndodh po atë mbrëmje në shtëpinë e Xhekut. *(Kevin troket në derën kryesore.)*

Xheku: *(Duke hapur derën.)* Eja brenda, Kevin. Unë jam i gëzuar që ke ardhur për darkë.

Kevin: *(Duke u ulur.)* Ka kaluar shumë kohë që nuk jemi takuar.

Xheku: *(Duke u ulur.)* Po është mirë që të jemi së bashku. U befasova shumë kur të pashë në gjyq sot.

Kevin: Xhek, unë të jam shumë mirënjohës që ma pagove gjobën. Unë e pranoj se e meritoja atë, por nuk do ta kisha paguar dot.

Xheku: Dëgjo Kevin, si gjykatës unë duhet të të dënoja patjetër për shkeljen që bëre, por unë jam edhe vëllai yt, dhe doja ta tregoja dashurinë time duke paguar gjobën tënde.

Kevin: Faleminderit shumë. Që tani e tutje unë dua të jetoj në një mënyrë të tillë që nuk do të të turpërojë.

Xheku: Unë vetëm dëshiroj më të mirën tënde.

Kevin: Xhek, unë nuk mund të ta kthej kurrë këtë, por ndoshta unë mund të vij herë pa here nga shtëpia jote dhe të të laj makinën ose të pres barin. A do të më lësh ta bëj këtë?

Xheku: Po mund ta bësh por duhet ta dish se unë nuk ta pagova gjobën në mënyrë që ti të ma ktheje. Ti je vëllai im. Tani le hamë dhe mund të flasim më shumë për këtë.



**Skena 5** *(Dy gra janë ulur përballë njëra tjetrës.)*

Rrëfenjësi: Skena e fundit ndodh disa ditë më vonë në shtëpinë e disa komshinjve që kishin dëgjuar sesa i mirë kishte qenë Xheku me vëllain e tij.

Xheni: A nuk është e mrekullueshme ajo që bëri gjykatësi për vëllain e tij Kevin?

Mua më duket se ai është treguar shumë i hirshëm, apo jo Marie.

Maria: Sigurisht që po, Xheni. Kjo më solli ndër mend çfarë dëgjova të dielën e fundit në kishë, kur pastori po fliste për shfajësimin.

Xheni: Çfarë do të thotë shfajësim, Marie, dhe çfarë ka të bëjë me gjykatësin dhe Kevinin?

Maria: Në fakt Bibla na mëson që ne jemi të gjithë si Kevin në një farë mënyre ne nuk i kemi bërë të njëjtat gjëra të këqija, por ne të gjithë kemi mëkatuar kundër Perëndisë duke qenë egoistë, duke mos thënë gjithnjë të vërtetën, duke mos iu bindur urdhërimeve të Perëndisë.

Xheni: Po, është e vërtetë, por së paku ne nuk na ka dërguar policia në gjyq si të pandehur për ndonjë krim.

Maria: Në fakt Perëndia është si një gjykatës; Ai është plotësisht i mirë dhe i drejtë; por në të njëjtën kohë Ai na do. Kur Perëndia gjykatësi i madh i të

gjithë botës na sheh Ai shpall që ne jemi të gjithë fajtorë të shkeljeve të urdhërimeve të Tij dhe që ndëshkimi i mëkateve tona është vdekja.

Xheni: Kjo është pikërisht si gjykatës Xheku kur e shpalli Kevinin fajtor, apo jo?

Por a e bëri Perëndia atë që bëri Xheku duke e paguar ndëshkimin për ne? Po, Ai bëri edhe më tepër. Ai dha Birin e Tij të vetëm që të vdiste për ne.

Zoti Jezus nuk pagoi për ne para, por dha gjakun e jetës së Tij për të marrë ndëshkimin e vdekjes që ne meritonim.

Xheni: Po ku hyn këtu shfajësimi?

Maria: Shfajësim do të thotë që Perëndia mund të na shpallë tani "jo fajtorë dhe në rregull me ligjin" sepse Jezusi pagoi për mëkatet tona dhe mori ndëshkimin tonë. Pastori lexoi të dielën nga libri i Romakëve, që ne jemi shfajësuar prej gjakut të Tij.

Xheni: Tani unë po filloj ta kuptoj përse historia e gjykatësit dhe Kevinit të kujtonte ty predikimin mbi shfajësimin.

Maria: Po, Xheni, dhe ka edhe një varg tjetër tek Romakëve që thotë se ne duhet të shfajësohemi me anë të besimit. Kjo do të thotë që nëse ne i besojmë Jezu Krishtit si Zotit dhe Shpëtimtarit tonë, atëherë ne do të jemi të lirë dhe nuk kemi pse të vuajmë për mëkatet tona.

Xheni: Kjo është e mrekullueshme, Marie

Maria: Po, sigurisht që është. Unë i kërkoja Krishtit disa vite më parë që të bëhej Shpëtimtari im dhe tani e di se jam e lirë nga ndëshkimi i mëkateve

të mia; unë nuk do të jem i ndarë përgjithnjë nga Perëndia.

Xheni: Unë besoj se ti ndjehesh si Kevin, pasi Xheku pagoi gjobën e tij.

Maria: Po Xheni. Unë i jam aq shumë mirënjohëse Perëndisë që ka dhënë Birin e Tij për mua, dhe që

më ka shpallur jo-fajtores.  
Unë dua që t'ia bëj të ditur  
Atij që e dua Atë dhe dua të  
jetoj për Jezusin.

Xheni: Ti më bëre të mendoj,  
Marie. Unë do të doja të  
dija që para Perëndisë  
edhe unë jam shpallur e  
pafajshme. A mund të  
flasim më shumë për këtë  
nesër? Tani më duhet të  
nxitoj e të bëj pazarin.

Maria: Natyrisht që po Xheni. Eja  
sa herë që të duash dhe të  
bisedojmë bashkë.  
Unë do të jem e kënaqur që  
të të shpjegoj me aq sa  
mundem dhe do të lutem  
për ty gjithashtu.

### **Rolet**

Xheku: 13 rreshta  
Kevin: 15 rreshta  
Rrëfenjës: (Mund të jetë një vajzë.) 5  
rreshta  
Zoti Tod: 6 rreshta  
Zonja Stjuart: 4 rreshta  
Polici i parë: 3 rreshta  
Polici i dytë: 2 rreshta  
Sekretaria e gjyqit: (Një vajzë.) 1 rresht  
Xheni: 9 rreshta  
Maria: 9 rreshta